





舊五代史卷二十五

宋門下侍郎參知政事監修國史薛居正等撰

唐書第一

武皇紀上

太祖武皇帝諱克用本姓朱耶氏其先隴右金城人也  
始祖拔野唐貞觀中爲墨離軍事從太宗討高麗薛延  
陀有功爲金方道副都護因家于瓜州太宗平薛延陀  
諸部于安西北庭置都護屬之分同羅僕骨之人置沙  
陀都督府蓋北庭有磧曰沙陀故因以爲名焉永徽中  
以拔野爲都督其後子孫五世相承曾祖盡忠貞元中



繼爲沙陁府都督既而爲吐蕃所陷乃舉其族七千帳徙于甘州盡忠尋率部衆三萬東奔俄而吐蕃追兵大至盡忠戰歿祖執宜卽盡忠之長子也收合餘衆至于靈州德宗命爲陰山府都督元和初入爲金吾將軍遷蔚州刺史代北行營招撫使新唐書沙陁傳元和三年盡忠款靈州塞詔處其部鹽州置陰山府以執宜爲府兵馬使朝長安授特進金吾衛將軍從攻鎮州進蔚州刺史破吳元濟授檢校刑部尚書長慶初破賊深州入朝留宿衛拜金吾衛將軍太和中授陰山府都督代北行營招撫使莊宗卽位追諡爲昭烈皇帝廟號懿祖烈考國昌本名赤心唐朔州刺史咸通中討龐勛有功入爲金吾上將軍賜姓李氏名國昌代州有唐故龍武軍統軍檢校司徒贈太保隴西李公神道碑云公諱國昌字

德興仍係鄭王房出爲振武節度使尋爲吐渾所襲退保

于神武川及武皇鎮太原表爲代北軍節度使中和三年薨莊宗卽位追諡爲文皇廟號獻祖武皇卽獻祖之第三子也母秦氏以大中十年丙子歲九月二十二日生于神武川之新城在姪十三月載誕之際母艱危者竟夕族人憂駭市藥于鴈門遇神叟告曰非巫醫所及可馳歸盡率部人被甲持旄擊鉦鼓躍馬大噪環所居三周而止族人如其教果無恙而生是時虹光燭室白氣充庭井水暴溢武皇始言喜軍中語齟齬善騎射與儕類馳騁嬉戲必出其右年十三見雙鳧翔于空射之

乾隆四十九年校刊

書志卷之三十一

十一



連中衆皆臣伏新城北有毗沙天王祠祠前井一日沸  
溢武皇因持卮酒而奠曰予有尊主濟民之志無何井  
溢故未察其禍福惟天王若有神奇可與僕交談奠酒  
未已有神人被金甲持戈隱然出于壁間見者大驚走  
惟武皇從容而退繇是益自負獻祖之討龐勛也武皇  
年十五從征摧鋒陷陣出諸將之右軍中目爲飛虎子  
賊平獻祖授振武節度使武皇爲雲中牙將嘗在雲中  
宿于別館擁妓醉寢有俠兒持刃欲害武皇及突入曲  
室但見烈火熾赫于帳中俠兒駭異而退又嘗與達靺  
部人角勝達靺指雙鷗于空曰公能一發中否武皇卽

彎弧發矢連貫雙鷗邊人拜伏及壯爲雲中守捉使事  
防禦使支謨與同列晨集解舍因戲升郡閣踞謨之座  
謨亦不敢詰乾符三年朝廷以段文楚爲代北水陸發  
運雲州防禦使時歲薦饑文楚稍削軍食諸軍咸怨武  
皇爲雲中防邊督將部下爭訴以軍食不充邊校程懷  
素王行審蓋寓李存璋薛鐵山康君立等卽擁武皇入  
雲州衆且萬人營于鬪雞臺城中械文楚出以應于外  
諸將列狀以聞請授武皇旄鉞朝廷不允徵諸道兵以  
討之乾符五年黃巢渡江其勢滋蔓天子乃悟其事以  
武皇爲大同軍節度使檢校工部尚書冬獻祖出師討



党項吐渾赫連鐸乘虛陷振武舉族爲吐渾所擄武皇至定邊軍迎獻祖歸雲州雲州守將拒關不納武皇略蔚朔之地得三千人屯神武川之新城赫連鐸晝夜攻圍武皇昆弟三人四面應賊俄而獻祖自蔚州引軍至吐渾退走自是軍勢復振天子以赫連鐸爲大同軍節度使仍命進軍以討武皇乾符六年春朝廷以昭義節度使李鈞充北面招討使將太原之師過石嶺關屯于代州與幽州李可舉會赫連鐸同攻蔚州獻祖以一軍禦之武皇以一軍南抵遮虜城以拒李鈞是冬大雪弓弩弦折南軍苦寒臨戰大敗奔歸代州李鈞中流矢而

卒廣明元年春天子復命元帥李涿率兵數萬屯代州武皇令軍使傅文達起兵于蔚州朔州刺史高文集與薛葛安慶等部將縛文達送于李涿六月李涿引大軍攻蔚州獻祖戰不利乃率其族奔于達靺部居數月吐渾赫連鐸密遣人賂達靺以離間獻祖旣而漸生猜阻武皇知之每名其豪右射獵于野或與之百步馳射馬鞭或以懸針樹葉爲的中之如神由是部人心伏不敢竊發俄而黃巢自江淮北渡武皇椎牛釀酒饗其酋首酒酣諭之曰予父子爲賊臣讒間報國無由今聞黃巢北犯江淮必爲中原之患一日天子赦宥有詔徵兵僕



與公等向南而定天下是予心也人生世間光景幾何曷能終老沙堆中哉公等勉之達靺知無留意皆釋然無間是歲十一月黃巢寇潼關天子令河東監軍陳景思爲代北起軍使收兵破賊十二月黃巢犯長安僖宗幸蜀陳景思與李友金發沙陁諸部五千騎南赴京師友金卽武皇之族父也通鑑友金初與高文集竝降于李琢故得與陳景思南赴京師中和元年二月友金軍至絳州將渡河刺史瞿稹謂陳景思曰巢賊方盛不如且還代北徐圖利害四月友金旋軍鴈門瞿稹至代州半月之間募兵三萬營于崞縣之西其軍皆北邊五部之衆不閑軍法瞿稹李友金不

能制友金謂景思曰興大衆成大事當威名素著則可以伏人今軍雖數萬苟無善帥進亦無功吾兄李司徒父子去歲獲罪于國家今寄北部雄武之略爲衆所推若驃騎急奏召還代北之人一麾響應則妖賊不足平也景思然之促奏行在天子乃以武皇爲鴈門節度使仍令以本軍討賊新唐書王重榮傳重榮懼黃巢復振憂之與楊復光計復光曰我世與李克用共憂患其人忠不顧難死義如已李友金發五百若乞師焉事蔑不濟乃遣使者約連和

騎齎詔召武皇于達靺武皇卽率達靺諸部萬人趨鴈門五月整兵二萬南嚮京師太原鄭從讜以兵守石嶺關武皇乃引軍出他道至太原城下會大雨班師于鴈



門中和二年八月獻祖自達靺部率其族歸代州十月  
武皇率忻代蔚朔達靺之軍三萬五千騎赴難于京師  
先移檄太原鄭從讜拒關不納武皇以兵擊之進軍至  
城下遣人齎幣馬遺從讜從讜亦遣人饋武皇貨幣饗  
餼軍器武皇南去自陰地趨晉絳十二月武皇至河中  
中和三年正月晉國公王鐸承制授武皇東北面行營  
都統武皇令其弟克修領前鋒五百騎渡河視賊黃巢  
遣將米重威齎重賂及偽詔以賜武皇武皇納其賂以  
給諸將燔其偽詔是時諸道勤王之師雲集京畿然以  
賊勢尚熾未敢爭鋒及武皇將至賊帥相謂曰鴉兒軍

至當避其鋒武皇以兵自夏陽濟河二月營于乾坑店  
黃巢大將尚讓林言王璠趙璋等引軍十五萬屯于梁  
田坡翼日大軍合戰自午及晡巢賊大敗是夜賊衆遁  
據華州武皇進軍圍之巢弟黃鄴黃揆固守三月尚讓  
引大軍赴援武皇率兵萬餘逆戰于零口巢軍大敗武  
皇進軍渭橋翼日黃揆棄華州而遁王鐸承制授武皇  
鴈門節度使檢校尚書左僕射四月黃巢燔長安收其  
餘衆東走藍關武皇進收京師七月天子授武皇金紫

光祿大夫檢校左僕射河東節度使

舊唐書僖宗紀五  
月制以鴈門以北

行營節度忻代蔚朔等州觀察處置等使檢校尚書左  
僕射代州刺史上柱國食邑七百戶李克用檢校司空



同平章事兼太原尹北京留守充河東節度管內觀察處置等使新唐書沙陀傳云收京師功第一進同中書門下平章事隴西郡公未幾以克用領河東節度是時武皇既收長安軍勢甚雄諸侯之師皆畏之武皇一目微眇故其時號爲獨眼龍是月武皇仗節赴鎮遣使報鄭從讜請治裝歸朝武皇次于郊外因往赴鴈門寧觀獻祖八月自鴈門赴鎮河東時年二十有八十一月平潞州表其弟克修爲昭義節度使潞帥孟方立退保于邢州十二月許帥田從異汴帥朱溫徐帥時溥陳州刺史趙犖各遣使來告以巢蔡合從凶鋒尚熾請武皇共力討賊中和四年春武皇率蕃漢之師五萬自澤潞將下天井關河陽節度使

諸葛爽辭以河橋不完仍屯兵于萬善數日移軍自河中南渡趨汝洛四月武皇合徐汴之師破尚讓于太康斬獲萬計進攻賊于西華賊將黃鄴棄營而遁是夜大雨巢營中驚亂乃棄西華之壘退營陳州北故陽里五月癸亥大雨震電平地水深數尺賊營爲水所漂而潰戊辰武皇引軍營于中牟大破賊于王滿渡庚午巢賊大至濟汴而北是夜復大雨賊黨驚潰武皇營于鄭州賊衆分寇汴境武皇渡汴遇賊將渡而南半濟擊之大敗之臨陣斬賊將李周王濟安陽景彪等是夜賊大敗殘衆保于胙縣冤句大軍躡之黃巢乃携妻子兄弟千



餘人東走武皇追賊至于巢州是月班師過汴汴帥迎勞于封禪寺請武皇休于府第乃以從官三百人及監軍使陳景思館于上源驛是夜張樂陳宴席汴帥自佐饗出珍幣侑勸武皇酒酣戲諸侍妓與汴帥握手叙破賊事以爲樂汴帥素忌武皇乃與其將楊彥洪密謀竊發彥洪于巷陌連車樹柵以扼奔竄之路時武皇之從官皆醉俄而伏兵竊發來攻傳舍武皇方大醉譟聲動地從官十餘人捍賊侍人郭景銖滅燭扶武皇以茵幕裹之匿于牀下以水洒面徐曰汴帥謀害司空武皇方張目而起引弓抗賊有頃煙火四合復大雨震電武皇

得從者薛鐵山賀回鶻等數人而去雨水如澍不辨人物隨電光登尉氏門縋城而出得還本營監軍陳景思大將史敬思竝遇害武皇旣還營與劉夫人相向慟哭詰旦欲勒軍攻汴夫人曰司空比爲國家討賊赴東諸侯之急雖汴人謀害自有朝廷論列若反戈攻城則曲在我也人得以爲辭乃收軍而去馳檄于汴帥汴帥報曰竊發之夜非僕本心是朝廷遣天使與牙將楊彥洪同謀也武皇自虎牢關西趨蒲陝而旋秋七月至太原武皇自以累立大功爲汴帥怨圖陷沒諸將乃上章申理及武皇表至朝廷大恐遣內臣宣諭尋加守太傅同



平章事隴西郡王光啓元年三月幽州李可舉鎮州王景崇連兵寇定州節度使王處存求援于武皇武皇遣大將康君立安老薛可郭啜率兵赴之五月鎮人攻無極武皇親領兵救之鎮人退保新城武皇攻之斬首萬餘級獲馬千匹王處存亦敗燕軍于易州十一月河中王重榮遣使來乞師且言邠州朱玫鳳翔李符將加兵于已初武皇與汴人構怨前後八表請削奪汴帥官爵自以本軍進討天子累遣內臣楊復恭宣旨令且全大體武皇不時奉詔天子頗右汴帥時觀軍容使田令孜君側擅權惡王重榮與武皇膠固將離其勢乃移重榮

于定州重榮告于武皇武皇上章言李符朱玫挾邪忌

正黨庇朱溫臣已點檢蕃漢軍五萬取來年渡河先斬

朱玫李符然後平盪朱溫

新唐書王重榮傳詔克用將兵援河中重榮貽克用書且

言奉密詔須公到使我圖公此令玫朱全忠朱玫之惑上也因示偽詔克用方與全忠有隙信之請討全忠及

玫天子覽表遣使譬喻百端輶傳相望既而朱玫引邠

鳳之師攻河中王重榮出師拒戰朱玫軍于沙苑對壘

月餘十二月武皇引軍渡河與朱玫決戰玫大敗收軍

夜遁入于京師時京城大駭天子幸鳳翔武皇退軍于

河中光啓二年正月僖宗駐蹕于寶雞武皇自河中遣

使上章請車駕還京且言大軍止誅凶黨時田令孜請



僖宗南幸興元武皇遂班師朱玫于鳳翔立嗣襄王愬  
爲帝以僞詔賜武皇武皇燔之械其使馳檄諸方鎮遣  
來使奉表于行在九月武皇遣昭義節度使李克修討  
孟方立于邢州大敗方立之衆于焦岡斬首數千級以  
大將安金俊爲邢州刺史以撫其降人十月進攻邢州  
邢人出戰又敗之孟方立求援于鎮州鎮人出兵三萬  
以援方立克修班師光啓三年六月河中節度使王重  
榮爲部將常行儒所殺武皇表重榮兄重盈爲帥七月  
武皇以安金俊爲澤州刺史時張全義自河陽據澤州  
及李罕之收復河陽召全義令守洛陽全義乃棄澤州

而去故以金俊守之文德元年二月僖宗自興元還京  
三月僖宗崩昭宗卽位以武皇爲開府儀同三司檢校  
太師兼侍中隴西郡王食邑七千戶食實封二百戶河  
南尹張全義潛兵夜襲李罕之于河陽城陷舉族爲金  
義所擄罕之踰垣獲免遂來歸于武皇遣李存孝薛阿  
檀史儼兒安金俊安休休將七千騎送罕之至河陽汴  
將丁會牛存節葛從周將兵赴援李存孝率精騎逆戰  
于溫縣汴人旣扼大行之路存孝殿軍而退騎將安休  
休以戰不利奔于蔡武皇以罕之爲澤州刺史遙領河  
陽節度使十月邢州孟方立遣大將奚忠信將兵三萬



寇遼州武皇大破之斬首萬級生擒奚忠信龍紀元年五月遣李罕之李存孝攻邢州六月下磁州邢將馬漑率兵數萬來拒戰罕之敗之于琉璃陂生擒馬漑徇于城下孟方立恚恨飲醜而死三軍立其姪遷爲留後使求援于汴汴將王虔裕率精甲數百入于邢州罕之等班師大順元年遣李存孝攻邢州孟遷以邢洛磁三州降執汴將王虔裕三百人以獻武皇徙孟遷于太原以安金俊爲邢洛團練使三月昭義軍節度使李克修卒以李克恭爲潞州節度使是月武皇攻雲州拔其東城赫連鐸求援于燕燕帥李匡威將兵三萬以赴之戰于

城下燕軍大敗時徐州時溥爲汴軍所攻遣使來求援武皇命石君和由兗鄆以赴之五月潞州軍亂殺節度使李克恭州人推牙將安居受爲留後南結汴將時溥之小將馮霸擁叛徒三千騎駐于沁水居受使人召之馮霸不至居受懼出奔至長子爲村胥所殺傳首于霸霸遂入潞州自爲留後武皇遣大將康君立李存孝等攻之汴將朱崇節葛從周率兵入潞州以固之是時幽州李匡威雲州赫連鐸與汴帥協謀連上表請加兵于太原宰相張濬孔緯贊成其事六月天子削奪武皇官爵以張濬爲招討使以京兆尹孫揆爲副華州韓建爲



行營都虞候以汴帥爲河東南面招討使幽州李匡威爲河東北面招討使雲州赫連鐸爲副汴將朱友裕將兵屯晉絳時汴軍已據潞州又遣大將李讜等率軍數萬急攻澤州武皇遣李存孝自潞州將三千騎以援之汴將鄧季筠以一軍犯陣存孝追擊擒其都將十數人獲馬千餘匹是夜李讜收軍而退大軍掩擊至馬牢關斬首萬餘級追襲至懷州而還存孝復引軍攻潞州八月存孝擒新授昭義節度使孫揆初朝廷授揆節鉞以本軍取刀黃嶺路赴任存孝偵知之引騎三百伏于長子縣崖谷間揆建牙持節褻衣大蓋擁衆而行存孝突

出谷口遂擒揆及中使韓歸範并將校五百人存孝械揆等以組練繫之環于潞州遂獻于武皇武皇謂揆曰公縉紳之士安言徐步可至達官何用如是揆無以對令繫于晉陽獄武皇將用爲副使使人誘之揆言不遜遂殺之九月汴將葛從周棄潞州而遁武皇以康君立爲潞州節度使以李存孝爲汾州刺史十月張濬之師入晉州遊軍至汾隰武皇遣薛鐵山李承嗣將騎三千出陰地關營于洪洞遣李存孝將兵五千營于趙城華州韓建以壯士三百人冒犯存孝之營存孝追擊直壓晉州西門張濬之師出戰爲存孝所敗自是閉壁不出



存孝引軍攻絳州十二月晉州刺史張行恭棄城而奔  
韓建張濬由含山路遁去大順二年春正月武皇上章  
申理其略曰臣今身無官爵名是罪人不敢歸陛下藩  
方且欲于河中寄寓進退行止伏候聖裁天子尋就加  
守中書令歐陽史二月復拜克用河東節度使是月魏  
博爲汴將葛從周所寇節度使羅宏信遣使來求援武  
皇出師以赴之三月邢州節度使安知建叛奔青州天  
子以知建爲神武統軍自棗州沂河歸朝鄆州朱瑄邀  
斬于河上傳首晉陽以李存孝爲邢州節度使四月武  
皇大舉兵討赫連鐸于雲州遣騎將薛阿檀率前軍以

進攻武皇設伏兵于御河之上大破之因塹守其城七  
月武皇進軍柳會赫連鐸力屈食盡奔于吐渾部遂歸  
幽州雲州平武皇表石善友爲大同軍防禦使邢州節  
度使李存孝以鎮州王鎔託附汴人謀亂河朔北連燕  
寇請乘雲代之捷平定燕趙武皇然之八月大蒐于晉  
陽遂南巡澤潞略地懷孟河陽趙克裕望風送款請修  
隣好九月蒐于邢州十月李存孝董前軍攻臨城鎮人  
五萬營于臨城西北龍尾岡武皇令李存審李存賢以  
步軍攻之鎮人大敗殺獲萬計拔臨城進攻元氏幽州  
李匡威以步騎五萬營于鄆邑以援鎮州武皇分兵大



掠旋軍邢州

舊五代史卷二十五

舊五代史卷二十五攷證

唐武皇紀上中和三年薨

案新唐書沙陀傳作光啓

三年國昌卒與是書異

以武皇爲大同軍節度使

案歐陽史作拜克用爲大

同防禦使新唐書作以國昌爲大同軍防禦使通鑑  
作以國昌爲大同節度使俱與是書異

天子復命元帥李涿

案歐陽史作招討使李琢通鑑

亦作琢俱與是書異

與薛葛安慶等部將

案新唐書作薩葛首領米海萬

安慶



天子乃以武皇爲鴈門節度使 案新唐書表中和二年以河東忻代二州隸鴈門節度更大同節度爲鴈門節度治代州是中和二年以前鴈門非鎮名也據舊唐書初赦克用拜代州刺史忻代兵馬留後二年擢鴈門節度神策天寧軍鎮遏忻代觀察使是克用爲鴈門節度實在二年是書作元年疑誤

十一月平潞州表其弟克修爲昭義節度使 案通鑑克用表克修爲昭義軍節度使在四年八月與是書異

汴帥素忌武皇 案梁紀作李克用乘醉任氣帝不平之攷新唐書沙陀傳亦作全忠忌克用桀邁難制與此紀合蓋全忠攻上源驛實忌其威名而欲害之非徒以其乘醉任氣也

鎮州王景崇 王景崇舊唐書作王鎔攷藩鎮傳景崇以中和二年卒子鎔繼立是光啓初寇定州者當爲王鎔也通鑑從舊唐書

光啓元年三月節度使王處存求援于武皇武皇遣大將康君立安老薛可郭啜率兵赴之五月鎮人攻無極武皇親領兵救之 案曲陽天安廟李克用題名碑云李克用以幽鎮侵擾中山領蕃漢步騎五十萬



親來救援時中和五年二月二十一日也至三月十七日以幽州請就和斷遂卻班師攷舊唐書中和五年三月丙辰朔丁卯駕至京師己巳御宣正殿大赦改元是三月之十四日己改光啓曲陽去京師遠故未知耳又克用親援處存與通鑑遣將康君立異今攷是書武皇先遣康君立等與通鑑合繼乃親領兵救之與題名碑合惟是書作五月碑作三月微有互異耳

乃移重榮于定州 案歐陽史作徙重榮于兗州攷新唐書王重榮傳亦云令攷徙重榮兗海節度使與是

### 書異

武皇上章言李符朱攷挾邪忌正 李符歐陽史作李昌符蓋唐實錄避獻祖諱故去昌字

孟方立恚恨飲酖而死三軍立其姪遷爲畱後 案舊唐書昭宗紀歐陽史莊宗紀皆以孟遷爲方立之弟新唐書孟方立傳作方立之從弟此紀又作方立之姪未詳孰是

六月天子削奪武皇官爵 六月新唐書作五月以張濬爲招討使 案新唐書本紀作張濬爲行營都招討宣慰使張濬傳作河東行營兵馬招討制置使



歐陽史作太原四面行營兵馬都統

華州韓建爲行營都虞候 案歐陽史作韓建爲副使

新唐書張濬傳作韓建爲供軍使

八月存孝擒新授昭義節度使孫揆 案新唐書作七

月戊申李克用執昭義節度使孫揆通鑑從是書作

八月

張濬之師出戰爲存孝所敗 案新唐書帝紀作十一

月張濬及李克用戰于陰地敗績歐陽史亦作十一

月與是書先後互異

舊五代史卷二十五攷證

舊五代史卷二十六

新唐書卷一百一十五

宋門下侍郎參知政事監修國史薛居正等撰

唐書第二

武皇紀下

景福元年正月鎮州王鎔恃燕人之援率兵十餘萬攻邢州之堯山武皇遣李存信將兵應援李存孝素與存信不協遞相猜貳留兵不進武皇又遣李嗣勳李存審將兵援之大破燕趙之衆斬首三萬收其軍實三月武皇進軍渡滹沱攻欒城下鼓城藁城四月燕軍寇雲代武皇班師八月赫連鐸誘幽州李匡威之衆八萬寇天



成軍遂攻雲州營于州北連亘數里武皇潛軍入于雲州詰旦出騎軍以擊之斬獲數萬李匡威燒營而遁十月邢州李存孝叛納款于梁李存信構之也景福二年春大舉以伐王鎔以其通好于李存孝也二月攻天長鎮旬日不下王鎔出師三萬來援武皇逆戰于叱日嶺下鎮人敗斬首萬餘級時歲饑軍乏食脯尸肉而食之進軍下井陘李存孝將兵夜入鎮州鎮人乞師于汴汴帥方攻時溥不暇應之乃求援于幽州李匡威率兵赴之武皇乃班師七月武皇討李存孝于邢州遂攻平山渡滹水攻鎮州王鎔懼以帛五十萬犒軍請修舊好仍

以鎮冀之師助擊存孝許之武皇進圍邢州十二月武皇狩于近郊獲白兔有角長三寸乾寧元年三月邢州李存孝出城首罪繫歸太原轅于市邢洛磁三州平武皇表馬師素爲邢州節度使五月鄆州節度使朱瑄爲汴軍所攻遣使來乞師武皇遣騎將安福順安福應安福遷督精騎五百假道于魏州以應之九月潞州節度使康君立以酖死十月武皇自晉陽率師伐幽州初李匡儔奪據兗位燕人多不義之安塞軍戍將劉仁恭挈族歸于武皇武皇遇之甚厚仁恭數進畫于蓋寓言幽州可取之狀願得兵一萬指期平定武皇方討李存孝



于邢州輟兵數千欲納仁恭不利而還匡儔由是驕怠  
數犯邊境武皇怒故率軍以討之是時雲州吐渾赫連  
鐸白義誠並來歸命皆笞而釋之十一月進攻武州甲  
寅攻新州十二月李匡儔命大將率步騎六萬救新州  
武皇選精甲逆戰燕軍大敗斬首萬餘級生獲將領百  
餘人曳練徇于新州城下是夜新州降辛亥進攻媯州  
壬子燕兵復合于居庸關拒戰武皇命精騎以疲之令  
步將李存審由他道擊之自午至晡燕軍復敗甲寅李  
匡儔攜其族棄城而遁將之滄州隨行輜車臧獲妓妾  
甚衆滄帥盧彥威利其貨以兵攻匡儔于景城殺之盡

擄其衆丙辰進軍幽州其守城大將請降武皇令李存  
審與劉仁恭入城撫勞居人如故市不改肆封府庫以  
迎武皇乾寧二年正月武皇在幽州命李存審劉仁恭  
徇諸屬郡二月以仁恭爲權幽州留後從燕人之請也  
留腹心燕留德等十餘人分典軍政武皇遂班師凡駐  
幽州四十日六月武皇率蕃漢之師自晉陽趨三輔討  
鳳翔李茂貞邠州王行瑜華州韓建之亂先是三帥稱  
兵向闕同弱王室殺害宰輔時河中節度使王重盈卒  
重榮之子珂卽武皇之子壻也權典軍政其兄珙爲陝  
州節度使瑤爲絳州刺史與珂爭河中遂訴于岐邠華



三鎮言珂本蒼頭不當襲位珂亦訴于武皇武皇上表保薦珂乞授河中旄鉞詔可之三帥遂以兵入覲大掠京師請授王珂同州節度使王瑤河中節度使天子亦許之武皇遂舉兵表三帥之罪復移檄三鎮三鎮大懼是月次絳州刺史王瑤登陴拒命武皇攻之旬日而拔斬王瑤于軍門誅其黨千餘人七月次河中王珂迎謁于路己未同州節度使王行約棄城奔京師與左軍兵士劫掠西市都民大擾行約卽行瑜弟也庚申樞密使駱全瓘以武皇之軍將至請天子幸右軍指揮使李繼鵬茂貞假子也本姓閻名珪與全瓘謀劫天子幸鳳翔

左軍指揮使王行實亦行瑜之弟也與劉景宣欲劫天子幸邠州兩軍相攻縱火燒內門烟火蔽天天子急詔鹽州六都兵士令追殺亂兵左右軍退走王行瑜李茂貞聲言自來迎駕天子懼出幸南山駐蹕于莎城是夜熒惑犯心壬戌武皇進收同州聞天子幸石門遣判官王瓌奉表奔問天子遣使賜詔令與王珂同討邠鳳時武皇方攻華州俄聞李茂貞領兵士三萬至整屋王行瑜領兵至興平欲往石門迎駕乃解華州之圍進營渭橋天子遣延王戒丕丹王允齋詔促武皇兵直抵邠鳳八月乙酉供奉官張承業齋詔告諭涇帥張鐠已領步



騎三萬于京西北扼邠岐之路武皇進營渭北遣史儼將三千騎往石門扈駕遣李存信李存審會鄜延之兵攻行瑜之梨園寨天子削奪行瑜官爵以武皇爲天下兵馬都招討使以鄜州李思孝爲北面招討使以涇州張鑑爲西南面招討使天子又遣延王丹王賜武皇御衣及大將茶酒弓矢命二王兄事武皇延王傳天子密旨云日昨非卿至此已爲賊庭行酒之人矣所慮者二凶締合卒難翦除且欲姑息茂貞令與卿修好俟梟斬行瑜更與卿商量武皇上表請駕還京令李存節領二千騎于京西北以防邠賊奔突辛亥天子還官加武皇

守太師中書令邠寧四面行營都統時王行瑜弟兄固守梨園寨我師攻之甚急李茂貞遣兵萬餘來援行瑜營于龍泉鎮茂貞自率兵三萬迫咸陽武皇奏請詔茂貞罷兵兼請削奪茂貞官爵詔曰茂貞勒兵蓋備非常尋已發遣歸鎮又言茂貞已誅李繼鵬李繼畧卿可切戒兵甲無犯土疆武皇請賜河中王珂旌節三表許之又表李罕之爲副都統十月丙戌李存信于梨園寨北遇賊軍斬首千餘級自是賊閉壁不出戊子天子賜武皇內弟子四人又降朱書御札賜魏國夫人陳氏是月王行瑜因敗衄之後閉壁自固武皇令李罕之晝夜急



攻賊軍乏食拔營而去李存信與罕之等先伏軍于阨路俟賊軍之至縱兵擊之殺戮萬計是日收梨園等三寨生擒行瑜之子知進並母邱氏大將李元福等二百人送赴闕庭庚寅王行約王行實燒劫寧州遁走寧州守將徐景乞降武皇表蘇文建爲邠州節度使且于寧州爲治所十一月丁巳收龍泉寨時行瑜以精甲五千守之李茂貞出兵來援爲李罕之所敗邠賊遂棄龍泉寨而去行瑜復入邠州大軍進逼其城行瑜登城號哭曰行瑜無罪昨殺南北司大臣是岐帥將兵脅制主上請治岐州行瑜乞束身歸朝武皇報曰王尚父何恭之

甚耶僕受命討三賊臣公其一也如能束身歸闕老夫未敢專命爲公奏取進止行瑜懼棄城而遁武皇收其城封府庫遽以捷聞旣而慶州奏王行瑜將家屬五百人到州界爲部下所殺傳首闕下武皇旣平行瑜還軍渭北十二月武皇營于雲陽候討鳳翔進止乙未天子賜武皇爲忠貞平難功臣進封晉王加實封二百戶武皇復上表請討李茂貞天子不允武皇私謂詔使曰觀主上意疑僕別有他腸復何言哉但禍不去胎憂患未已又奏臣統領大軍不敢逕赴朝覲遂班師乾寧三年正月汴人大舉以攻兗鄆朱瑄朱瑾再乞師于武皇假



道于魏州羅宏信許之乃令都指揮使李存信將步騎三萬與李承嗣史儼會軍以拒汴人存信軍于莘與朱瑾合勢頻挫汴軍汴帥患之乃間魏人存信御兵無法稍侵魏之芻牧者宏信乃與汴帥通出師三萬攻存信軍存信揭營而退保于洛州三月武皇大掠相魏諸邑攻李固洹水殺魏兵萬餘人進攻魏州五月汴將葛從周氏叔琮引兵赴援六月李茂貞舉兵犯京師七月車駕幸華州是月武皇與汴軍戰于洹水之上鐵林指揮使落落被擒落落武皇之長子也旣戰馬踣于坎武皇馳騎以救之其馬亦踣汴之追兵將及武皇背射一發

而斃乃退九月李存信攻魏之臨清汴將葛從周等引軍來援大敗于宗城北存信進攻魏州十月武皇敗魏軍于白龍潭追擊至觀音門汴軍救至乃退十一月武皇徵兵于幽鎮定三州將迎駕于華下幽州劉仁恭託以契丹入寇俟敵退聽命乾寧四年正月汴軍陷兗鄆騎將李承嗣史儼與朱瑾同奔于淮南三月陝帥王珙攻河中王珂來告難武皇遣李嗣昭率二千騎赴之破陝軍于猗氏乃解河中之圍至是天子遣延王戒丕至晉陽傳宣旨于武皇朕不取卿言以及于此苟非英賢竭力朕何由再謁廟廷在卿表率予所望也七月武皇



復徵兵于幽州劉仁恭辭旨不遜武皇以書讓之仁恭  
捧書謾罵抵之于地仍囚武皇之行人八月大舉以伐  
仁恭九月師次蔚州戊寅晨霧晦暝占者云不利深入  
辛巳攻安塞俄報燕將單可及領騎軍至矣武皇方置  
酒高會前鋒又報賊至矣武皇曰仁恭何在曰但見可  
及輩武皇張目怒曰可及輩何足爲敵仍促令出師燕  
軍已擊武皇軍寨武皇乘醉擊賊燕軍披靡時步兵望  
賊而退爲燕軍所乘大敗于木瓜澗俄而大風雨震電  
燕軍解去武皇方醒甲午師次代州劉仁恭遣使謝罪  
于武皇武皇亦以書報之自此有檄十餘返光化元年

春正月鳳翔李茂貞華州韓建皆致書于武皇乞修和  
好同獎王室兼乞助丁匠修繕秦宮武皇許之四月汴  
將葛從周寇邢洛磁等州旬日之內三州連陷汴人以  
葛從周爲邢州節度使大將李存信收軍自馬嶺而旋  
八月壬戌天子自華還宮是時車駕初復而欲諸侯輯  
睦賜武皇詔令與汴帥通好武皇不欲先下汴帥乃致  
書于鎮州王鎔令導其意明年汴帥遣使奉書幣來修  
好武皇亦報之自是使車交馳朝野相賀九月武皇遣  
周德威李嗣昭率兵三萬出青山口以迫邢洛十月遇  
汴將葛從周于張公橋旣戰我軍大敗是月河中王珂



來告急言王珙引汴軍來寇武皇遣李嗣昭將兵三千以援之屯于胡壁堡汴軍萬餘人來拒戰嗣昭擊退之十二月潞州節度使薛志勤卒澤州刺史李罕之以本軍夜入潞州據城以叛罕之報武皇曰薛鐵山新死潞民無主慮軍城有變輒專命鎮撫武皇令人讓之罕之乃歸于汴武皇遣李嗣昭將兵討之下澤州收罕之家屬拘送晉陽光化二年春正月李罕之陷沁州三月汴將葛從周氏叔琮自土門陷承天軍又陷遼州進軍榆次武皇令周德威擊之敗汴軍于洞渦驛叔琮棄營而遁德威追擊出石會關殺千餘人汴人復陷澤州五月

武皇令都指揮使李君慶將兵收澤潞爲汴軍所敗而還以李嗣昭爲都指揮使進攻潞州八月嗣昭營于潞州城下前鋒下澤州時汴將賀德倫張歸厚等守潞州是月德倫等棄城而遁潞州平九月武皇表汾州刺史孟遷爲潞州節度使光化三年汴軍大寇河朔幽州劉仁恭乞師武皇遣周德威帥五千騎以援之七月李嗣昭攻堯山至內邱敗汴軍于沙河進攻洛州下之九月汴帥自將兵三萬圍洛州嗣昭棄城而歸葛從周設伏于青山口嗣昭之軍不利十月汴人乘勝寇鎮定鎮定懼皆納賄于汴是時周德威與燕軍劉守光敗汴人二



萬于望都聞定州王郜來奔乃班師是月天子加武皇  
實封一百戶遣李嗣昭率步騎三萬攻懷州下之進攻  
河陽汴將閻寶率軍來援嗣昭退保懷州天復元年正  
月汴將張存敬攻陷晉絳二州以兵二萬屯絳州以扼  
援路二月張存敬迫河中王珂告急于武皇使者相望  
于路珂妻邠國夫人武皇愛女也亦以書至懇切求援  
武皇報曰賊阻道路衆寡不敵救爾卽與爾兩亡可與  
王郎棄城歸朝珂遂送款于張存敬三月汴帥自大梁  
至河中王珂遂出迎尋徙于汴天子以汴帥兼鎮河中  
武皇自是不復能援京師霸業由是中否四月汴將氏

叔琮率兵五萬自太行路寇澤潞魏博大將張文恭領  
軍自新口入葛從周領兗鄆之衆自土門入張歸厚以  
邢洛之衆自馬嶺入定州王處直之衆自飛狐入侯言  
以晉絳之兵自陰地入氏叔琮康懷英營于澤州之昂  
車武皇令李嗣昭將三千騎赴澤州援李存璋而歸賀  
德倫氏叔琮軍至潞州孟遷開門迎沁州刺史蔡訓亦  
以城降于汴氏叔琮悉其衆趨石會關是時偏將李審  
建先統兵三千在潞州亦與孟遷降于汴及叔琮之入  
寇也審建爲其鄉導汴人營于洞渦別將白奉國與鎮  
州大將石公立自井陘入陷承天軍及攻壽陽遼州刺



史張鄂以城降于汴都人大恐時霖雨積旬汴軍屯聚  
既衆芻糧不給復多痢瘡師人多死時大將李嗣昭李  
嗣源每夜率驍騎突營掩殺敵衆恐懼五月汴軍皆退  
氏叔琮軍出石會周德威李嗣昭以精騎五千躡之殺  
戮萬計初汴軍之將入寇也汾州刺史李瑋據城叛以  
連汴人至是武皇令李嗣昭李存審將兵討之是歲并  
汾饑粟暴貴人多附瑋爲亂嗣昭悉力攻城三日而拔  
擒李瑋等斬于晉陽市氏叔琮既旋軍過潞州擄孟遷  
以歸汴帥以丁會爲潞州節度使六月遣李嗣昭周德  
威將兵出陰地攻慈隰二郡隰州刺史唐禮慈州刺史

張瓌並以城來降武皇以汴寇方盛難以兵服佯降心  
以緩其謀乃遣牙將張特持幣馬書檄以諭之陳當時  
利害請復舊好十一月王子汴帥營于渭濱甲寅天子

出幸鳳翔

新唐書帝如鳳翔李茂貞韓全誨請各克用  
入衛克用間道遣使者奔問並詒書全忠勸

還汴全忠  
不答

武皇遣李嗣昭率兵三千自沁州趨平陽遇汴

軍于晉州北斬首五百級天復二年二月李嗣昭周德  
威領大軍自慈隰進攻晉絳營于蒲縣乙未汴將朱友  
寧氏叔琮將兵十萬營于蒲縣之南乙巳汴帥自領軍  
至晉州德威之軍大恐三月丁巳有虹貫德威之營戊  
午氏叔琮率軍來戰德威逆擊爲汴人所敗兵仗輜車



委棄殆盡朱友寧長驅至汾州慈隰二州復爲汴人所據辛酉汴軍營于晉陽之西北攻城西門周德威李嗣昭緣山保其餘衆而旋武皇驅丁壯登陴拒守汴軍攻城日急武皇召李嗣昭周德威等謀將出奔雲州嗣昭以爲不可李存信堅請且入北蕃續圖進取嗣昭等固爭之太妃劉氏亦極言于內乃止居數日亡散之士復集軍城稍安李嗣昭與李嗣源夜入汴軍斬將搴旗敵人扞禦不暇自相驚擾丁卯朱友寧燒營而遁周德威追至白壁關俘斬萬計因收復慈隰汾等三州天復三年正月天子自鳳翔歸京五月雲州都將王敬暉殺刺

史劉再立以城歸于劉仁恭武皇遣李嗣昭討之仁恭遣將以兵五萬來援雲州嗣昭退保樂安燕人擄敬暉棄城而去武皇怒笞嗣昭及李存審而削其官是時親軍萬衆皆邊部人動違紀律人甚苦之左右或以爲言武皇曰此輩膽略過人數十年從吾征伐比年以來國藏空竭諸軍之家賣馬自給今四方諸侯皆懸重賞以募勇士吾若束之以法急則棄吾吾安能獨保此乎俟時開運泰吾固自能處置矣天祐元年閏四月汴帥迫天子遷都于洛陽新唐書帝東遷詔至太原克用泣謂其下曰乘輿不復西矣遣使者奔問行五月乙丑天子制授武皇叶盟同力功臣加食邑三



千戶實封三百戶八月汴帥遣朱友恭弒昭宗于洛陽宮輝王卽位告哀使至晉陽武皇南向慟哭三軍縞素天祐二年春契丹安巴堅始盛武皇召之安巴堅領其部族凡三十萬人至雲州與武皇會于雲州之東握手甚歡因結爲兄弟旬日而去留馬千匹牛羊萬計期以冬初大舉渡河天祐三年正月魏博旣殺牙軍魏將史仁遇據高唐以叛遣人乞師于武皇武皇遣李嗣昭率三千騎攻邢州以應之遇汴將牛存節張筠于青山口嗣昭不利而還九月汴帥親率兵攻滄州幽州劉仁恭遣使來乞師武皇乃徵兵于仁恭將攻潞州以解滄州

之圍仁恭遣掌書記馬郁都指揮使李溥等將兵三萬會于晉陽武皇遣周德威李嗣昭合燕軍以攻澤潞十二月潞州節度使丁會開門迎降命李嗣昭爲潞州節度使以丁會歸于晉陽天祐四年正月甲申汴帥聞潞州失守自滄州燒營而遁四月天子禪位于汴帥奉天子爲濟陰王改元爲開平國號大梁是歲四川王建遣使至勸武皇各王一方便破賊之後訪唐朝宗室以嗣帝位然後各歸藩守武皇不從以書報之曰竊念本朝屯否巨業淪胥攀鼎駕以長違撫彤弓而自咎默默終古悠悠彼蒼生此厲階永爲痛毒視橫流而莫救徒誓



檄以興言別捧函題過垂獎諭省覽周既駭惕異常淚  
下霑衿倍鬱申胥之素汗流浹背如聞蔣濟之言僕經  
事兩朝受恩三代位叨將相籍係宗枝賜鈇鉞以專征  
徵苞茅而問罪虜兵校戰二十餘年竟未能斬新莽之  
頭顱斷蚩尤之肩髀以至廟朝顛覆豺虎縱橫且授任  
分憂叨策冒寵龜玉毀積誰之咎歟俯閱指陳不勝慙  
慙然則君臣無常位陵谷有變遷或箠塞長河泥封函  
谷時移事改理有萬殊卽如周末虎爭魏初鼎據孫權  
父子不顯授于漢恩劉備君臣自微興于涿郡得之不  
謝于家世失之無損于功名適當逐鹿之秋何惜華蟲

之服惟僕累朝席寵奕世輸忠忝佩訓詞粗存家法善  
博奕者惟先守道治蹊田者不可奪牛誓于此生靡敢  
失節仰憑廟勝早殄寇讎如其事與願違則共臧洪遊  
于地下亦無恨矣惟公社稷元勳嵩衡降祉鎮九州之  
上地負一代之鴻才合于此時自求多福所承良訊非  
僕深心天下其謂我何有國非吾節也悽悽孤懇此不  
盡陳五月梁祖遣其將康懷英率兵十萬圍潞州懷英  
驅率士衆築壘環城城中音信斷絕武皇遣周德威將  
兵赴援德威軍于余吾率先鋒挑戰日有俘獲懷英不  
敢卽戰梁祖以懷英無功乃以李思安代之思安引軍



將營于潞城周德威以五千騎搏之梁軍大敗斬首千餘級思安退保堅壁別築外壘謂之夾寨以抗我之援軍梁祖調發山東之民以供饋運德威日以輕騎掩之運路艱阻衆心益恐李思安乃自東南山口築夾道連接夾寨以通饋運自是梁軍堅保夾寨冬十月武皇有疾是時晉陽城無故自壞占者惡之天祐五年正月戊子朔武皇疾革辛卯崩于晉陽年五十三遺令薄葬發喪後二十七日除服莊宗即位追諡武皇帝廟號太祖陵在鴈門五代史補太祖武皇本朱耶赤心之後沙陀部人也其先生于雕窠中酋長以其異生諸族傳養之遂以諸翁爲耶至太祖生眇一目長而驍勇善騎以諸翁爲朱以翁爲耶至太祖生眇一目長而驍勇善騎

射所向無敵時謂之獨眼龍大爲部落所疾太祖恐禍及遂舉族歸唐授雲州刺史賜姓李名克用黃巢犯長安自北引兵赴難功成遂拜太原節度使封晉王貌因使畫工詐爲商賈往河東寫之畫工到未幾人有知其謀者擒之武皇初甚怒既而親謂曰且吾素眇一日試召亟使汝來寫之觀其必畫工之尤也寫吾不及十分日淮南使汝來寫之觀其必畫工之尤也寫吾不及十分日淮階下便是死汝寫之扇角半遮其面武皇曰汝詔吾也遠皇執八角扇因寫扇角半遮其面武皇曰汝詔吾也遠使別寫之又應聲下筆畫其臂弓撚箭之狀仍微合一日以觀箭之曲直武皇大喜因厚賂金帛遣之五代史闕文世傳武皇臨薨以三矢付莊宗曰一矢討劉仁恭汝不先下幽州河南未可圖也一矢擊契丹且日安巴堅與吾把臂而盟結爲兄弟誓復唐家社稷今背約附賊汝必伐之而滅朱溫汝能成吾志死無憾矣莊宗藏三矢于武皇廟庭及討劉仁恭命幕吏以少牢告廟請一矢盛以錦囊使親將負之以爲前驅凱旋之日隨俘馘納矢于太廟伐契丹滅朱氏亦如之又武皇眇一目謂之獨眼龍性喜殺左右有小過失必寘于死初



諱眇人無敢犯者嘗令寫真畫工卽爲撚箭之  
狀微暝一目圖成而進武皇大悅賜予甚厚

史臣曰武皇肇跡陰山赴難唐室逐豺狼于魏闕殄氛  
禘于秦川賜姓受封奄有汾晉可謂有功矣然雖茂勤  
王之績而非無震主之威及朱旗屯渭曲之師俾翠輦  
有石門之幸比夫桓文之輔周室無乃有所愧乎洎失  
援于蒲絳久垂翅于并汾若非嗣子之英才豈有興王  
之茂業矧累功積德未比于周文創業開基尚虧于魏  
祖追諡爲武斯亦幸焉

舊五代史卷二十六

舊五代史卷二十六攷證

唐書武皇紀下景福元年正月鎮州王鎔恃燕人之援  
率兵十餘萬攻邢州之堯山 案舊唐書作大順二  
年王鎔援邢州屯于堯山攷此時邢州未叛於晉不  
得有王鎔之援師蓋卽景福元年事誤移于前一年  
耳歐陽史及通鑑俱與是書同

三月武皇進軍渡滹沱攻欒城下鼓城藁城四月燕軍  
寇雲代武皇班師 案舊唐書作景福元年二月庚  
寅太原易定之兵合勢攻鎮州三月克用處存斂軍  
而退是興師以二月至三月始旋師也通鑑云三月



克用王處存合兵攻王鎔癸丑拔天長鎮戊午鎔與  
戰于新市大破之辛酉克用退屯欒城是進師退師  
皆在三月也是書作三月進軍四月班師與諸書異  
十月邢州李存孝叛納款于梁李存信構之也 案舊  
唐書大順元年十一月癸丑朔太原將邢州刺史李  
存孝自恃擒孫揆功合爲昭義帥怨克用授康君立  
存孝自晉州率行營兵歸邢州據城上表歸朝仍致  
書張濬王鎔求援今攷是書大順二年存孝始爲邢  
州節度無由于元年冬得據邢州也新唐書歐陽史  
通鑑並從是書作景福元年十月

武皇表馬師素爲邢州節度使 案舊唐書作克用以  
大將馬師素權知邢洛團練事與是書異

是時雲州吐渾赫連鐸白義誠並來歸 案舊唐書昭  
宗紀作六月壬辰克用攻陷雲州執赫連鐸新唐書  
昭宗紀作六月赫連鐸與李克用戰于雲州死之通  
鑑從新唐書作克用大破吐谷渾殺赫連鐸擒白義  
誠俱與是書異攷雲州諸部因討李匡儔而來歸自  
當在十月而諸書皆作六月恐未足據

甲寅攻新州 案甲寅字誤下文十二月有辛亥壬子  
甲寅則十一月不得有甲寅也據通鑑攷異蓋薛史



仍紀年錄之誤

二月以仁恭爲權幽州留後 案舊唐書作乾寧元年  
十二月以李匡威故將劉仁恭爲幽州兵馬留後歐  
陽史亦作元年冬事皆因平幽州而終言之未嘗核  
其年月也通鑑從是書作二年二月  
八月乙酉供奉官張承業齎詔告諭 案舊唐書作七  
月丁卯上遣內官張承業傳詔克用軍與是書日月  
互異攷通鑑作壬午遣張承業詣克用軍蓋壬午遣  
使乙酉始至軍耳  
武皇上表請駕還京 案舊唐書作壬寅李克用遣子

存貞奉表行在請車駕還京攷當時奉表者卽後唐  
莊宗也莊宗未嘗名存貞舊唐書誤

十一月丁巳 案舊唐書作十一月癸未朔疑不當有  
丁巳據是書上文十月有丙戌戊子則十一月斷非  
癸未朔也通鑑所定日月皆從是書

還軍渭北十二月武皇營于雲陽 案歐陽史作晉軍  
渭北遇雨六十日攷通鑑十二月乙酉李克用軍于  
雲陽辛亥引兵東歸無緣得有六十日也歐陽史誤  
天祐二年春契丹安巴堅領部族三十萬至雲州與武  
皇會于雲州之東 案武皇會契丹于雲州通鑑作



開平元年新唐書作天祐元年與是書異歐陽史與是書同又契丹國志作晉王李存勗與契丹連和會于東城殊誤

梁祖以懷英無功乃以李思安代之 案李思安之代

懷英通鑑作七月事與是書繫五月異

安巴堅舊作阿保機今改

舊五代史卷二十六攷證

舊五代史卷二十七

宋門下侍郎參知政事監修國史薛居正等撰

唐書第三

莊宗紀一

莊宗光聖神閔孝皇帝諱存勗武皇帝之長子也母曰貞簡皇后曹氏以唐光啓元年歲在乙巳冬十月二十一日癸亥生帝于晉陽宮妊時曹后常夢神人黑衣擁扇夾侍左右載誕之辰紫氣出于窻戶及爲嬰兒體貌奇特沈厚不羣武皇特所鍾愛及武皇之討王行瑜帝時年十一從行初令入覲獻捷迎駕還宮昭宗一見駭



之曰此兒有奇表因撫其背曰兒將來之國棟也勿忘

忠孝于予家因賜醵鷲酒卮翡翠盤

北夢瑣言云昭宗曰此子可亞其父

時人號曰亞子

賊平授檢校司空隰州刺史改汾晉二郡皆遙

領之帝洞曉音律常令歌舞于前十三習春秋手自繕

寫略通大義及壯便射騎膽略絕人其心豁如也武皇

起義雲中部下皆北邊勁兵及破賊迎鑿功居第一由

是稍優寵士伍因多不法或陵侮官吏豪奪士民白晝

剽攘酒博喧競武皇緩于禁制惟帝不平之因從容啓

于武皇武皇依違之及安塞不利之後時事多難梁將

氏叔琮康懷英頻犯郊圻土疆日蹙城門之外鞠爲戰

場武皇憂形于色帝因啓曰夫盛衰有常理禍福繫神

道家世三代盡忠王室勢窮力屈無所愧心物不極則

不反惡不極則不亡今朱氏攻逼乘輿窺伺神器陷害

良善誣誑神祇以臣觀之殆其極矣大人當遵養時晦

以待其衰何事輕爲沮喪太祖釋然因奉觴作樂而罷

及滄州劉守文爲梁朝所攻其父仁恭遣使乞師武皇

恨其翻覆不時許之帝白曰此吾復振之道也不得以

嫌怨介懷且九分天下朱氏今有六七趙魏中山在他

廡下賊所憚者惟我與仁恭爾我之興衰繫此一舉不

可失也太祖乃徵兵于燕攻取潞州旣而丁會果以城



來降天祐五年春正月武皇疾篤召監軍張承業大將  
吳珙謂曰吾常愛此子志氣遠大可付後事惟卿等所  
教及武皇厭代帝乃嗣王位于晉陽時年二十有四汴  
人方寇潞州周德威宿兵于亂柳以軍城易帥竊議凶  
凶訛言播于行路帝方居喪將吏不得謁見監軍使張  
承業排闥至廬所言曰夫孝在不墜家業不同匹夫之  
孝且君父厭世嗣主未立竊慮兇猾不逞之徒有懷覬  
望又汴寇壓境利我凶衰苟或搖動則倍張賊勢訛言  
不息懼有變生請依顧命墨纒聽政保家安親此惟大  
孝帝于是始聽斷大事時振武節度使克寧卽帝之季

父也爲管內蕃漢馬步都知兵馬使典握兵柄帝以軍  
府事讓季父曰兒年幼稚未通庶政雖承遺命恐未能  
彈壓季父勳德俱高衆情推伏且請制置軍府俟兒有  
立聽季父處分克寧曰亡兄遺命屬在我兒孰敢異議  
因率先拜賀初武皇獎勵戎功多畜庶孽衣服禮秩如  
嫡者六七輩比之嗣王年齒又長部下各綰強兵朝夕  
聚議欲謀爲亂及帝紹統或強項不拜鬱鬱憤惋託疾  
廢事會李存顥以陰計干克寧曰兄亡弟立古今舊事  
季父拜姪理所未安克寧妻素剛狠因激怒克寧陰圖  
禍亂存顥欲干克寧之第謀害張承業李存璋等以并



汾九州歸附于梁送貞簡太后爲質克寧意將激發乃  
擅殺大將李存質請授已雲州節度使割蔚朔應三州  
爲屬郡帝悉俞允然知其陰禍有日矣克寧俟帝過其  
第則圖竊發時幸臣史敬鎔者亦爲克寧所誘盡得其  
情乃來告帝帝謂張承業曰季父所爲如此無猶子之  
情骨肉不可自相魚肉予當避路則禍亂不作矣承業  
曰臣受命先王言猶在耳存顯輩欲以太原降賊王欲  
何路求生不卽誅除亡無日矣因召吳珙李存璋李存  
敬朱守殷諭其謀衆咸憤怒二月壬戌命存璋伏甲以  
誅克寧遂靖其難是月唐少帝崩于曹州梁祖使人醜

之也帝聞之舉哀號慟三月周德威尙在亂柳梁將李  
思安屢爲德威所敗閉壁不出是時梁祖自將兵至澤  
州以劉知俊爲招討使以代思安以范君實劉重霸爲  
先鋒牛存節爲撫遏統大軍營于長子四月帝召德威  
軍歸晉陽汴人旣見班師知我國禍以爲潞州必取援  
軍無俟再舉遂停斥候梁祖亦自澤州歸洛帝知其無  
備乃謂將曰汴人聞我有喪必謂不能興師人以我少  
年嗣位未習戎事必有驕怠之心若簡練兵甲倍道兼  
行出其不意以吾憤激之衆擊彼驕惰之師拉朽摧枯  
未云其易解圍定霸在此一役甲子軍發自太原已巳



至潞州北黃碾下營五月辛未朔晨霧晦暝帝率親軍  
伏三垂岡下詰旦天復昏霧進軍直抵夾城時李嗣源  
總帳下親軍攻東北隅李存璋王霸率丁夫燒寨斷夾  
城爲二道周德威李存審各分道進攻軍士鼓譟三道  
齊進李嗣源壞夾城東北隅率先掩擊梁軍大恐南向  
而奔投戈委甲噎塞行路斬萬餘級獲其將副招討使  
符道昭洎大將三百人芻粟百萬梁招討使康懷英得  
百餘騎出天井關而遁梁祖聞其敗也旣懼而歎曰生  
子當如是李氏不亡矣吾家諸子乃豚犬爾初唐龍紀  
元年帝纔五歲從武皇校獵于三垂岡岡上有明皇原

廟在焉武皇于祠前置酒樂作伶人奏百年歌者陳其  
衰老之狀聲調悽苦武皇引滿捋鬚指帝曰老夫壯心  
未已二十年後此子必戰于此及是役也果符其言焉  
是月周德威乘勝攻澤州刺史王班登城拒守梁將劉  
知俊自晉絳將兵赴援德威退保高平帝遂班師于晉  
陽告廟飲至賞勞有差乃下令于國中禁盜賊恤孤寡  
徵隱逸止貪暴峻隄防寬獄訟朞月之間其俗丕變帝  
每出于路遇饑寒者必駐馬而臨問之由是人情大悅  
王霸之業自茲而基矣六月鳳翔李茂貞邠州楊崇本  
合四川王建之師五萬以攻長安遣使會兵于帝帝遣



張承業率師赴之九月邠岐蜀三鎮復大舉攻長安遣李嗣昭周德威將兵三萬攻晉州以應之德威與梁將尹皓戰于神山北梁人大敗是時晉之騎將夏侯敬受以一軍奔于梁德威乃退保隰州天祐六年秋七月邠岐二帥及梁之叛將劉知俊俱遣使來告將大舉以伐靈夏兼收關輔請出兵晉絳以張兵勢八月帝御軍南征先遣周德威李存審丁會統大軍出陰地關攻晉州爲地道壞城二十餘步城中血戰拒守梁祖遣楊師厚領兵赴援德威乃收軍而退通鑑引莊宗實錄云汴軍斬首三百級師厚退保絳州是役也小將蕭萬通戰歿師厚進營平陽德威收軍而退天祐七年

秋七月鳳翔李茂貞邠州楊崇本皆遣師來會兵同討靈夏且言劉知俊三敗汴軍于寧州靈夏危蹙岐隴之師大舉決取河西帝令周德威將兵萬人西渡河以應之是役也劉知俊爲岐人所搆乃自退九月德威班師冬十月梁祖遣大將李思安楊師厚率師營于澤州以攻上黨十一月鎮州王鎔遣使來求援是時梁祖以羅紹威初卒全有魏博之地因欲兼并鎮定遣供奉官杜廷隱丁延徽督魏軍三千人入于深冀鎮人懼故來告難帝集軍吏議之咸欲按甲治兵徐觀勝負惟帝獨斷堅欲救之乃遣周德威率軍屯于趙州是月行營都招



討使丁會卒十二月丁巳朔梁祖聞帝軍屯趙州命寧國軍節度使王景仁爲北面行營招討使韓勅爲副相州刺史李思安爲前鋒會魏州之兵以討王鎔又令閻寶王彥章率二千騎會景仁于邢洛丁丑景仁營于柏鄉帝遂親征自贊皇縣東下辛巳至趙州與周德威兵合帝令史建瑋以輕騎嘗寇獲芻牧者二百人問其兵數精兵七萬是日帝觀兵于石橋南詰旦進軍距柏鄉一舍周德威史建瑋率蕃落勁騎以挑戰四面馳射梁軍閉壁不出乃退翼日進軍距柏鄉五里遣騎軍逼其營梁將韓勅李思安率步騎二萬鎧甲炫曜其勢甚盛

分道以薄帝軍德威且戰且退距河而止旣而德威偵知梁人造浮橋乃退保高邑乙酉致師于柏鄉帝禱戰于光武廟柏鄉無芻粟之備梁軍以樵采爲給爲帝之游軍所獲由是堅壁不出剉屋茅坐席以秣其馬衆心益恐天祐八年正月丁亥周德威史建瑋帥三千騎致師于柏鄉設伏于村塢間遣三百騎直壓其營梁將怒悉其軍結陣而來德威與之轉戰至高邑南梁軍列陣橫亙六七里時帝軍未成列李存璋引諸軍陣于野河之上梁軍以五百人爭橋鎮定之師與血戰梁軍敗而復整者數四帝與張承業登高觀望梁人戈矛如束申



令之後躡聲若雷王師進退有序步騎嚴整寂然無聲  
帝臨陣誓衆人百其勇短兵旣接無不奮力梁有龍驤  
神威拱宸等軍皆武勇之士也每一人鎧仗費數十萬  
裝以組繡飾以金銀人望而畏之自己及午騎軍接戰  
至晡梁軍欲抽退塵埃漲天德威周麾而呼曰汴人走  
矣帝軍齊譟以進魏人收軍漸退李嗣源率親軍與史  
建瑋安金全兼北部吐渾諸軍衝陣夾攻梁軍大敗棄  
鎧投仗之聲震動天地龍驤神威神捷諸軍殺戮殆盡  
自陣至柏鄉數十里殭尸枕籍敗旗折戟所在蔽地夜  
漏一鼓帝軍入柏鄉梁軍輜重帳幄資財奴僕皆爲帝

軍所有梁將王景仁韓勅李思安等以數十騎夜遁是  
役也斬首二萬級獲馬三千匹鎧甲兵仗七萬輜車鍋  
幕不可勝計擒梁將陳思權以下二百八十五人帝號  
令收軍于趙州旣而梁人棄深冀二州而遁初杜廷隱  
之襲深冀也聲言分兵就食時王鎔將石公立戍深州  
欲杜關不納鎔遽令啓關命公立移軍于外廷隱遂據  
其城公立旣出指城圍而言曰開門納盜後悔何追此  
城數萬生靈生爲俘馘矣因投刃泣下數日廷隱閉城  
殺鎮兵數千人遂登陴拒守王鎔方命公立攻之卽有  
備矣及柏鄉之敗兩州之人悉爲奴擄老弱者皆坑之



已亥遣史建瑋周德威徇地于邢魏先馳檄以諭之府册  
元龜載晉王諭邢洛魏博衛滑諸郡檄天祐八年正  
月周德威等破賊徇地邢洛先馳檄天祐八年正  
諸郡縣曰王室遇屯七廟被陵夷之酷昊天不弔萬民  
罹塗炭之災必有英主奮庸忠臣仗順長鯨而清四  
海靖祇祿以泰三靈予位忝維城任當分闡念茲顛覆  
詎可宴安故仗桓文輔合之規問羿泥凶之罪逆温  
碭山庸隸巢孽餘凶當僖宗奔播之初我太祖掃平之  
際東身泥首請命牙門苞藏姦詐之心惟示婦人之態  
我太祖俯憐窮鳥曲為開懷特發表章請帥梁汴纔出  
荏蒲之澤便居茅社之尊殊不感恩遽行猜忍我國家  
祚隆周漢迹盛伊唐二十聖之或代襲簪纓或門傳忠  
孝則五侯九伯內則百辟千官或代襲簪纓或門傳忠  
皆遭陷害永抱沈寃且鎮定兩藩國家巨鎮冀安民而  
保族咸屈節以稱藩逆温唯伏陰謀專行不義欲全吞  
噬先據屬州趙州特發使車來求援助予情惟濫寇義  
切親仁躬率賦輿赴茲盟約賊將王景仁將兵十萬屯  
據柏鄉遂驅三鎮之師授以七擒之略鵲鳩地流血成  
大奔易如走坂之勢若燎原之火僵尸仆地流泉成

川組甲雕戈皆投草莽謀夫猛將盡作俘囚羣凶既快  
于天誅大戮須垂于鬼錄今則選蒐兵甲簡練車徒乘  
勝長驅剪除元惡凡爾魏博邢洛之黨遂忘覆載之恩  
乃祖乃孫為聖唐赤子豈徇虎狼之黨遂忘覆載之恩  
蓋以封豕長蛇憑陵薦食無方逃難遂被脅從空嘗  
以銜冤竟無門而雪憤既聞告捷想所慰懷今義旅  
征止于招撫昔耿純焚廬而向順蕭何舉族以從軍  
審料興亡能圖富貴殊勳茂業翼子貽孫轉禍以從  
在官資百姓則優加賞賜所經註誤更不推窮三鎮  
補官已申嚴令不得焚燒廬舍剽掠馬牛但仰所生  
各安耕織予恭行天罰罪止元凶已外歸明一切不問  
凡爾士眾帝御親軍南征庚子至洛州梁祖令其將徐  
咸諒予懷仁浦將兵五百夜入邢州張承業李存璋以三鎮步兵  
攻邢州遣周德威史建瑋將三千騎長驅至澶魏帝與  
李嗣源率親軍繼進二月戊午師次洹水周德威進至  
李嗣源率親軍繼進二月戊午師次洹水周德威進至

乾隆四十九年校刊



臨河已未魏帥羅周翰出兵五千塞石灰窰口周德威以騎掩擊迫入觀音門是日王師迫魏州帝舍于狄公祠西周翰閉壁自固帝軍攻之其城幾陷帝歎曰予為兒童時從先王渡河今其忘矣方春桃花水滿思一觀之誰從予者癸亥帝觀河于黎陽是時梁祖發兵萬餘將渡河聞王師至棄舟而退黎陽都將張從楚曹儒以部下兵三千人來降立其軍為左右匡霸使乙丑周德威自臨清狗地貝郡攻博州下東武朝城時澶州刺史張可臻棄城而遁遂攻黎陽下臨河淇門庚午梁祖在洛聞王師將攻河陽率親軍屯白馬坡壬申帝下令班

師帝至趙州王鎔迎謁翼日大饗諸軍壬午帝發趙州歸晉陽留周德威戍趙州三月己丑鎮定州各遣使言幽州劉守光凶僭之狀請推為尚父以稔其惡乙未帝至晉陽宮召監軍張承業諸將等議幽州之事乃遣牙將戴漢超齎墨制并六鎮書推劉守光為尚書令尚父守光由是凶熾日甚遂邀六鎮奉冊五月六鎮使至幽

州梁使亦集通鑑攷異引莊宗實錄云三月己丑鎮州自尊大請稔其惡以咎之推為尚父乙未上至晉陽宮召張承業諸將等議討燕之謀諸將亦云宜稔其惡上令押衙戴漢超持墨制及六鎮書如幽州其辭曰天祐八年三月二十七日天德車節度使宋瑤振武節度使周德威昭義節度使李嗣昭易定節度使王瑾奉冊進盧龍節度使王鎔河東節度使尚書令晉王謹奉冊進盧龍

乾隆四十九年校刊

舊唐書卷三十七

李絳

九



橫海等軍節度檢校大尉中書令燕王爲尚書令尚父  
五月六鎮使至汴使亦集六月守光令有司定尚父採  
訪使是月梁祖遣都招討使楊師厚將兵三萬屯邢州  
帝令李嗣昭出師掠相衛而還秋七月帝會王鎔于承  
天軍鎔武皇之友也帝奉之盡敬捧卮酒爲壽鎔亦捧  
酒醕帝鎔幼子昭誨從行因許爲婚八月甲子幽州劉  
守光僭稱大燕皇帝年號應天九月庚子梁祖將親軍  
自洛渡河而北至相州聞帝軍未出乃止十月幽州劉  
守光殺帝之行人李承勳忿其不行朝禮也十一月辛  
丑燕人侵易定王處直來告難十二月甲子帝遣周德  
威劉光濬李嗣源及諸將率蕃漢之兵發晉陽伐劉守

光于幽州



舊五代史卷二十七

舊五代史卷二十七攷證

唐莊宗紀一及武皇之討王行瑜帝時年十一 案歐陽史從是書作十一吳縝纂誤據徐無黨注莊宗年四十三逆推之當以甲辰年生乾寧二年破王行瑜時當云年十二今攷五代會要莊宗以光啓元年生年四十二北夢瑣言載莊宗獻王行瑜捷年十一薛歐二史俱同徐注作年四十三誤

汴將氏叔琮康懷英 案懷英本名懷貞後因避梁末帝諱始改名懷英是書前後統作懷英今仍其舊  
周德威宿兵于亂柳 亂柳原本作亂楊攷歐陽史作



亂柳胡三省通鑑注云亂柳在潞州屯留縣界今改正

以并汾九州歸附于梁 案并汾九州通鑑作河東九州胡三省注云河東領并遼沁汾石忻代嵐憲九州附識于此

承業曰臣受命先王 案先王原本作先帝攷晉王嗣位之初武皇尚未追稱爲帝今改正

二月壬戌 壬戌原本作丙戌今據通鑑改正

至潞州北黃碾下營 黃碾原本作黃碾通鑑作黃碾胡三省注云黃碾村在潞州潞城縣今改正

初唐龍紀元年帝纔五歲 案歐陽史克用破孟方立于邢州還軍上黨置酒三垂岡時莊宗在側方五歲攷克用邢州之役在文德元年今以莊宗生年計之當從是書作龍紀元年

周德威乘勝攻澤州刺史王班登城拒守 案通鑑攷異引莊宗實錄云李存璋進攻澤州刺史王班棄城而去與是書異

德威乃退保隰州 案通鑑作周德威等聞梁帝將至乙未退保隰州是德威之退師因梁祖之親至也是書不載



距柏鄉五里 五里原本作七里今據歐陽史及通鑑  
改正

梁軍以五百人爭橋 案通鑑作梁軍橫亙數里競前  
奪橋鎮定步兵禦之勢不能支與此微異

率親軍屯白馬坡 白馬坡通鑑作白馬阪

並六鎮書 六鎮原本作大鎮今據通鑑改正

十一月辛丑燕人侵易定 案通鑑作戊申燕主守光  
將兵二萬寇易定是書作辛丑與通鑑異

舊五代史卷二十七攷證

舊五代史卷二十八

宋門下侍郎參知政事監修國史薛居正等撰

唐書第四

莊宗紀二

天祐九年春正月庚辰朔周德威等自飛狐東下丙戌  
會鎮定之師進營祁溝庚子次涿州刺史劉知溫以城  
歸順德威進迫幽州守光出兵拒戰燕將王行方等以  
部下四百人來奔二月庚戌朔梁祖大舉河南之衆以  
援守光以陝州節度使楊師厚爲招討使河南李周彝  
爲副青州賀德倫爲應接使鄆州袁象先爲副甲子梁

乾隆四十九年校刊

唐書卷二十八

本紀



祖自洛陽趨魏州遣楊師厚李周彝攻鎮州之棗強命  
賀德倫攻蓍縣三月壬午梁祖自督軍攻棗強甲申城  
陷屠之時李存審與史建瑋以三千騎屯趙州相與謀  
曰梁軍若不攻蓍城必西攻深冀吾王方北伐以南鄙  
之事付我輩豈可坐觀其弊乃以八百騎趨冀州扼下  
博橋令史建瑋李都督分道擒生翼日諸軍皆至獲芻  
牧者數百人盡殺之縱數人逸去且告晉王至矣建瑋  
與李都督各領百餘騎旗幟軍號類梁軍與芻牧者雜  
行暮及賀德倫營門殺守門者縱火大呼俘斬而旋又  
執芻牧者斷其手令迴梁軍乃夜遁蓍人持鉏耰白挺

追擊之悉獲其輜重

通鑑後梁紀云帝燒營夜遁迷失道委曲行百五十里戊子旦乃至

冀州蓍之耕者皆荷鉏耰逐之委棄軍資器械不可勝計

梁祖聞之大駭自棗強

馳歸貝州殺其將張正言許從實朱彥柔以其亡師于  
蓍也梁祖先抱痼疾因是愈甚辛丑滄州都將張萬進  
殺留後劉繼威自爲滄帥遣人送款于梁亦乞降于帝  
戊申周德威遣李存暉攻瓦橋關下之四月丁巳梁祖  
自魏南歸疾篤故也戊申李嗣源攻瀛州拔之五月乙  
卯朔周德威大破燕軍于羊頭岡擒大將軍廷珪斬首  
五千餘級德威自涿州進軍于幽州營于城下閏月己  
酉攻其西門燕人出戰敗之六月戊寅梁祖爲其子友



珪所弑友珪僭卽帝位于洛陽秋八月朱友珪遣其將韓勅康懷英牛存節率兵五萬急攻河中朱友謙遣使來求援帝命李存審率師救之十月癸未帝自澤州路赴河中遇梁將康懷英于平陽破之斬首千餘級追至白徑嶺朱友謙會帝于猗氏梁軍解圍而去庚申周德威報劉守光三遣使乞和不報丁卯燕將趙行實來奔天祐十年春正月丁巳周德威攻下順州獲刺史王在思二月甲戌朔攻下安遠軍獲燕將一十八人庚寅梁朱友珪爲其將袁象先所殺均王友貞卽位于汴州丙申周德威報檀州刺史陳確以城降三月甲辰朔收盧

臺軍乙丑收古北口時居庸關使胡令珪等與諸戍將相繼挈族來奔丙寅武州刺史高行珪遣使乞降時劉守光遣愛將元行欽牧馬于山北聞行珪有變率戍兵攻行珪行珪遣其弟行溫爲質且乞應援周德威遣李嗣源李嗣本安金全率兵救武州降元行欽以歸四月甲申燕將李暉等二十餘人舉族來奔德威攻幽州南門壬辰劉守光遣使王遵化致書哀祈于德威德威戲遵化曰大燕皇帝尚未郊天何怯劣如是耶守光再遣哀祈德威乃以狀聞己亥劉光濬攻下平州獲刺史張在吉五月壬寅朔光濬進迫營州刺史楊靖以城降乙



已梁將楊師厚會劉守奇率大軍侵鎮州時帝之先鋒  
將史建瑋自趙州率五百騎入真定師厚大掠鎮冀之  
屬邑王鎔告急于周德威德威分兵赴援師厚移軍寇  
滄州張萬進懼遂降于梁六月壬申朔帝遣監軍張承  
業至幽州與周德威會議軍事秋七月承業與德威率  
千騎至幽州西守光遣人持信箭一隻乞修和好承業  
曰燕帥當令子弟一人爲質則可是日燕將司全爽等  
十一人並舉族來奔辛亥德威進攻諸城門王子賊將  
楊師貴等五十人來降甲子五院軍使李信攻下莫州  
時守光繼遣人乞降將緩帝軍陰令其將孟修阮通謀

于滄州節度使劉守奇及求援于楊師厚帝之游騎擒  
其使以獻是月帝會王鎔于天長九月劉守光率衆夜  
出遂陷順州冬十月己巳朔守光率七百騎步軍五千  
夜入檀州庚午周德威自涿州將兵躡之壬申守光自  
檀州南山而遁德威追及大敗之獲大將李劉張景紹  
及將吏八百五十人馬一百五十匹守光得百餘騎遁  
入山谷德威急馳扼其城門守光惟與親將李小喜等  
七騎奔入燕城己丑守光遣牙將劉化修周遵業等以  
書幣哀祈德威庚寅守光乘城以病告復令人獻自乘  
馬玉鞍勒易德威所乘馬而去俄而劉光濬擒送守光



偽殿直二十五人于軍門守光又乘城謂德威曰予俟  
晉王至卽泥首俟命祈德威卽馳驛以聞十一月己亥  
朔帝下令親征幽州甲辰發晉陽己未至范陽辛酉守  
光奉禮幣歸款于帝帝單騎臨城邀守光辭以他日蓋  
爲其親將李小喜所扼也是夕小喜來奔帝下令諸軍  
詰旦攻城壬戌梯幢並進軍士畢登帝登燕丹塚以觀  
之有頃擒劉仁恭以獻癸亥帝入燕城諸將畢賀十二  
月庚午墨制授周德威幽州節度使癸酉檀州燕樂縣  
人執劉守光并妻李氏祝氏子繼祚以獻己卯帝下令  
班師自雲代而旋時鎮州王鎔定州王處直遣使請帝

由井陘而西許之庚辰帝發幽州攜仁恭父子以行甲  
申次定州舍于關城翼日次曲陽與王處直謁北嶽祠  
是日次衡唐鎮州王鎔迎謁于路天祐十一年春正月  
戊戌朔王鎔以履新之日與其子昭祚昭誨奉觴上壽  
置宴鎔啟曰燕王劉太師頃爲鄰國今欲挹其風儀可  
乎帝卽命主者破械引仁恭守光至與之同宴鎔饋以  
衣被飲食己亥帝發鎮州因與王鎔畋于衡唐之西壬  
子至晉陽以組練繫仁恭守光號令而入是日誅守光  
遣大將李存霸拘送仁恭于代州刺其心血奠告于武  
皇陵然後斬之是月鎮州王鎔定州王處直遣使推帝



爲尙書令初王鎔稱藩于梁梁以鎔爲尙書令至是鎮  
定以帝南破梁軍北定幽薊乃共推崇焉使三至帝讓  
乃從之遂選日受冊開霸府建行臺如武德故事秋七  
月帝親將自黃沙嶺東下會鎮人進軍邢洺梁將楊師  
厚軍于漳東帝軍次張公橋旣而裨將曹進金奔于梁  
帝軍不利而退八月還晉陽天祐十二年三月梁魏博  
節度使賀德倫遣使奉幣乞盟時楊師厚卒于魏州梁  
王乃割相衛澶三州別爲一鎮以德倫爲魏博節度使  
以張筠爲相州節度使魏人不從是月二十九日夜魏  
軍作亂囚德倫于牙署三軍大掠軍士有張彥者素實

凶暴爲亂軍之首迫德倫上章請卻復六州之地梁主  
不從遂迫德倫歸于帝且乞師爲援帝命馬步副總管  
李存審自趙州帥師屯臨清帝自晉陽東下與存審會

通鑑晉王引大軍自黃澤嶺東下與存  
審會于臨清猶疑魏人之詐按兵不進賀德倫遣從事

司空頰至軍密啟張彥狂勃之狀且曰若不翦此亂階  
恐貽後悔帝默然遂進軍永濟張彥謁見以銀槍効節  
五百人從皆被甲持兵以自衛帝登樓諭之曰汝等在  
城濫殺平人奪其妻女數日以來迎訴者甚衆當斬汝  
等以謝鄴人遽令斬彥及同惡者七人軍士股慄帝親  
加慰撫而退翼日帝輕裘緩策而進令張彥部下軍士



被甲持兵環馬而從命爲帳前銀槍軍衆心大服梁將  
劉鄩聞帝至以精兵萬人自洹水趣魏縣帝命李存審  
帥師禦之帝率親軍于魏縣西北夾河爲柵六月庚寅  
朔帝入魏州賀德倫上符印請帝兼領魏州帝從之墨  
制授德倫大同軍節度令取便路赴任帝下令撫諭鄴  
人軍城畏肅民心大服是時以貝州張源德據壘拒命  
南通劉鄩又與滄州首尾相應聞德州無備遣別將襲  
之遂拔其城命遼州牙將馬通爲德州刺史以扼滄貝  
之路秋七月梁澶州刺史王彥章棄城而遁畏帝軍之  
逼也以故將李巖爲澶州刺史帝至魏縣因率百餘騎

覘梁軍之營是日陰晦劉鄩伏兵五千于河南叢木間  
帝至伏兵忽起大譟而來圍帝數十重帝以百騎馳突  
奮擊梁軍辟易決圍而出有頃援軍至乃解帝顧謂軍  
士曰幾爲賊所笑是月劉鄩潛師由黃澤西趣晉陽至  
樂平而還遂軍于宗城初鄩在洹水數日不出寂無聲  
迹帝遣騎覘之無斥候者城中亦無煙火之狀但有鳥  
止于壘上時見旗幟循堞往來帝曰我聞劉鄩用兵一  
步百變必以詭計誤我使視城中乃縛旗于芻偶之上  
使驢負之循堞而行得城中羸老者詰之云軍去已二  
日矣旣而有人自鄩軍至者言兵已趣黃澤帝遽發騎



追之時霖雨積旬鄆軍倍道兼行皆腹疾足腫加以山路險阻崖谷泥滑緣蘿引葛方得少進顛墜巖坂陷于泥淖而死者十二三前軍至樂平糗糒將竭聞帝軍追躡于後太原之衆在前羣情大駭鄆收合其衆還自邢州陳宋口渡漳水而東駐于宗城時魏之軍儲已乏臨清積粟所在鄆引軍據之周德威初聞鄆軍之西自幽州率千騎至土門及鄆軍東下急趨南宮知鄆軍在宗城遣十餘騎迫其營擒斥候者斷其腕令還德威至臨清鄆起軍駐貝州帝率親騎次博州鄆軍于堂邑周德威自臨清率五百騎躡之是日鄆軍于莘縣帝營于莘

西一舍城壘相望日夕交鬪八月梁將賀瓌襲取澶州帝遣李存審率兵五千攻貝州因塹而圍之冬十月有軍士自鄆軍來奔帝善待之乃劉鄆密令齎賂帝膳夫欲寘毒于食中會有告者索其黨誅之天祐十三年春二月帝知劉鄆將謀速戰乃聲言歸晉陽以誘之實勞軍于貝州也令李存審守其營鄆謂帝已臨晉陽將乘虛襲鄆遣其將楊延直自澶州率兵萬人會于城下夜半至于南門之外城中潛出壯士五百人突入延直之軍譟聲動地梁軍自亂遲明鄆自莘引軍至城東與延直兵會鄆之來也李存審率兵踵其後李嗣源自魏



城出戰俄而帝自貝州至鄆卒見帝驚曰晉王耶因引軍漸卻至故元城西李存審大軍已成列矣軍前後爲方陣梁軍于其間爲圓陣四面受敵兩軍初合梁軍稍衄再合鄆引騎軍突西南而走帝以騎軍追擊之梁步兵合戰短兵旣接帝軍鼓譟圍之數重埃塵漲天李嗣源以千騎突入其間衆皆披靡相躡如積帝軍四面斬擊棄甲之聲聞數十里衆旣奔潰帝之騎軍追及于河上十百爲羣赴水而死梁步兵七萬殲亡殆盡劉鄆自黎陽濟奔滑州是月梁主遣別將王檀率兵五萬自陰地關趨晉陽急攻其城昭義李嗣昭遣將石嘉才率騎

三百赴援時安金全張承業堅守于內嘉才救援于外檀懼乃燒營而遁追擊至陰地關時劉鄆敗于莘縣王檀遁于晉陽梁主聞之曰吾事去矣三月乙卯朔分兵以攻衛州壬戌刺史米昭以城降夏四月攻洺州下之五月帝還晉陽六月命偏師攻閻寶于邢州梁主遣捉生都將張溫率步騎五百爲援至內黃溫率衆來奔秋七月甲寅朔帝自晉陽至魏州八月大閱師徒進攻邢州相州節度使張筠棄城遁去以袁建豐爲相州刺史依舊隸魏州邢州節度使閻寶請以城降以忻州刺史蕃漢副總管李存審爲邢州節度使以閻寶爲西南面



招討使遙領天平軍節度使是月契丹入蔚州振武節度使李嗣本陷于契丹九月帝還晉陽梁滄州節度使戴思遠棄城遁去舊將毛璋入據其城李嗣源帥師招撫璋以城降乃以李存審爲滄州節度使以李嗣源爲邢州節度使時契丹犯塞帝領親軍北征至代州北聞蔚州陷乃班師遼史太祖紀十一月攻蔚新武媯儒五州自代北至河曲踰陰山盡有其地其圍蔚州敵樓無故自壞衆軍大譟乘之不踰時而破是月貝州平以向任滄州降將毛璋爲貝州刺史自是河朔悉爲帝所有帝自晉陽復至于魏州天祐十四年二月帝聞劉鄩復收殘兵保守黎陽遂率師以攻之不克而還是月甲午新州將盧

文進殺節度使李存矩叛入契丹遂引契丹之衆寇新州存矩帝之諸弟也治民失政御下無恩故及于禍帝以契丹主安巴堅與武皇屢盟于雲中旣又約爲兄弟急難相救至是容納叛將違盟犯塞乃馳書以讓之契丹攻新州甚急刺史安金全棄城而遁契丹以文進部將劉殷爲刺史帝命周德威率兵三萬攻之營于城東俄而文進引契丹大至德威拔營而歸因爲契丹追躡師徒多喪契丹乘勝寇幽州是時言契丹者或云五十萬或云百萬漁陽以北山谷之間羶車毳幕羊馬彌漫盧文進招誘幽州亡命之人教契丹爲攻城之具飛梯



衝車之類畢陳于城下鑿地道起土山四面攻城半月之間機變百端城中隨機以應之僅得保全軍民困弊上下恐懼德威間道馳使以聞帝憂形于色召諸將會議時李存審請急救燕薊且曰我若猶豫未行但恐城中生事李嗣源曰願假臣突騎五千以破契丹閻寶曰但當蒐選銳兵控制山險強弓勁弩設伏待之帝曰吾有三將無復憂矣夏四月命李嗣源率師赴援次于涑水又遣閻寶率師夜過祁溝俘擒而還周德威遣人告李嗣源曰契丹三十萬馬牛不知其數近日所食羊馬過半安巴堅責讓盧文進深悔其來契丹勝兵散布射

獵安巴堅帳前不滿萬人宜夜出奇兵掩其不備嗣源

具事以聞

遼史太祖紀四月圍幽州不克六月乙巳望

霖潦班師畱盧國用守之是契丹主已于六月退師矣秋七月辛未帝遣李存審

領軍與嗣源會于易州步騎凡七萬于是三將同謀銜枚束甲尋澗谷而行直抵幽州八月甲午自易州北循山而行李嗣源率三千騎爲前鋒庚子循大房嶺而東距幽州六十里契丹萬騎遽至存審嗣源極力以拒之契丹大敗委棄毳幕羶廬弓矢羊馬不可勝紀進軍追討俘斬萬計辛丑大軍入幽州德威見諸將握手流涕翼日獻捷于鄴九月班師帝授存審檢校太傅嗣源檢



校太保閻寶加同平章事十月帝自魏州還晉陽十一月復至魏州十二月帝觀兵于河上時梁人據楊劉城列柵相望帝率軍履河冰而渡盡平諸柵進攻楊劉城城中守兵三千人帝率騎軍環城馳射又令步兵持斧斬其鹿角負葭葦以堙塹帝自負一圍而進諸軍鼓譟而登遂拔其壘獲守將安彥之是夕帝宿楊劉天祐十五年春正月帝軍徇地至鄆濮時梁主在洛將修郊禮聞楊劉失守狼狽而還二月梁將謝彥章帥衆數萬來迫楊劉築壘以自固又決河水瀾漫數里以限帝軍六月壬戌帝自魏州復至楊劉甲子率諸軍涉水而進梁

人臨水拒戰帝軍小卻俄而鼓譟復進梁軍漸退因乘勢而擊之交鬪于中流梁軍大敗殺傷甚衆河水如絳謝彥章僅得免去是月淮南楊溥遣使來會兵將致討于梁也秋八月辛丑朔大閱于魏郊河東魏博幽滄鎮定邢洛麟勝雲朔十鎮之師及奚契丹室韋吐渾之衆十餘萬部陣嚴肅旌甲照曜師旅之盛近代爲最己酉梁兗州節度使張萬進遣使歸款帝自魏州率師次于楊劉略地至鄆濮而還遂營于麻家渡諸陣列營十數梁將賀瓌謝彥章以軍屯濮州行臺村結壘相持百餘日帝嘗以數百騎摩壘求戰謝彥章率精兵五千伏于



隄下帝以十餘騎登堤伏兵發圍帝十數重俄而帝之  
騎軍繼至攻于圍外帝于圍中躍馬奮擊決圍而出李  
存審兵至梁軍方退是時帝銳于接戰每馳騎出營存  
審必叩馬進諫帝伺存審有間卽策馬而出顧左右曰  
老子妨吾戲耳至是幾危方以存審之言爲忠也十二  
月庚子朔帝進軍距梁軍柵十里而止時梁將賀瓌殺  
騎將謝彥章于軍帝聞之曰賊帥自相魚肉安得不亡  
戊午下令軍中老幼令歸魏州悉兵以趣汴庚申大軍  
毀營而進辛酉次于臨濮梁軍捨營踵于後癸亥次胡  
柳陂遲明梁軍亦至帝率親軍出視諸軍從之梁軍已

成陣橫亙數十里帝亦以橫陣抗之時帝與李存審總  
河東魏博之衆居其中周德威以幽薊之師當其西鎮  
定之師當其東梁將賀瓌王彥章全軍接戰帝以銀槍  
軍突入梁軍陣中斬擊十餘里賀瓌王彥章單騎走濮  
陽帝軍輜重在陣西望見梁軍旗幟皆驚走因自相蹈  
籍不能禁止帝一軍先敗周德威戰沒是時陂中有土  
山梁軍數萬先據之帝帥中軍至山下梁軍嚴整不動  
旗幟甚盛帝呼諸軍曰今日之戰得山者勝賊已據山  
吾與爾等各馳一騎以奪之帝率軍先登銀槍步兵繼  
進遂奪其山梁軍紛紜而下復于土山西結陣數里時



日已曠矣或曰諸軍未齊不如還營詰朝可圖再戰閻  
寶進曰深入賊境逢其大敵期于盡銳以決雌雄況賊  
帥奔亡衆心方恐今乘高擊下勢如破竹矣銀槍都將  
王建及被甲橫槩進曰賊將先已奔亡王之騎軍一無  
所損賊衆晡晚大半思歸擊之必破王但登山縱觀責  
臣以破賊之效于是李嗣昭領騎軍自土山北以逼梁  
軍王建及呼士衆曰今日所失輜重並在山下乃大呼  
以奮擊諸軍繼之梁將大敗時元城令吳瓊貴鄉令胡  
裝各部役徒萬人于山下曳柴揚塵鼓譟助其勢梁軍  
不之測自相騰籍棄甲山積甲子命行戰場收獲鎧仗

不知其數時帝之軍士有先入大梁問其次舍者梁人  
大恐驅市人以守其殘衆奔歸汴者不滿千人帝軍遂  
拔濮陽



舊五代史卷二十八

舊五代史卷二十八攷證

唐莊宗紀二梁祖自督軍攻棗強甲申城陷屠之 甲

申通鑑作丙戌

周德威大破燕軍于羊頭岡 案通鑑作龍頭岡攷異

引莊宗實錄作羊頭岡

十一月己亥朔帝下令親征幽州 案歐陽史作十月

劉守光請降王如幽州

是日誅守光 案遼史太祖紀七年正月晉王李存勗

拔幽州擒劉守光攷遼史太祖七年卽天祐十年莊

宗以天祐十年冬始拔幽州十一年正月乃凱旋也



遼史誤以次年事先一年書之

遣使推帝爲尚書令 案通鑑攷異引唐實錄云天祐八年晉王已稱尚書令是書作天祐十一年與唐實錄異

是月二十九日夜 案通鑑攷異引莊宗實錄作二十七日今攷是書賀德倫傳作二十九日與此紀合

以故將李巖爲澶州刺史 李巖通鑑攷異引莊宗實錄作李巖

決圍而出 案通鑑作自午至申乃得出亡其七騎遣將石嘉才 嘉才梁紀作家才唐列傳作家財

以袁建豐爲相州刺史依舊隸魏州 案通鑑作四月晉人拔洛州以魏州都巡檢使袁建豐爲洛州刺史八月晉人復以相州隸天雄軍以李嗣源爲刺史與是書異

是月契丹入蔚州振武節度使李嗣本陷于契丹 案歐陽史及通鑑俱從是書作蔚州遼史太祖紀作神冊元年八月拔朔州擒節度使李嗣本與是書異是月淮南楊溥遣使來會兵將致討于梁也 案十國春秋吳世家作七月晉王李存勗遣間使持帛書會兵伐梁王辭以虔州之難與是書異



安巴堅舊作阿保機今改

舊五代史卷二十八攷證

舊五代史卷二十九

宋門下侍郎參知政事監修國史薛居正等撰

唐書第五

莊宗紀三

天祐十六年春正月李存審城德勝夾河爲柵帝還魏州命昭義軍節度使李嗣昭權知幽州軍府事三月帝兼領幽州遣近臣李紹宏提舉府事夏四月梁將賀瓌圍德勝南城百道攻擊復以艤艦扼斷津度帝馳而往陣于北岸南城守將氏延賞告急且言矢石將盡帝以重賄召募能破賊艦者于是獻技者數十或言能吐火



焚舟或言能禁呪兵刃悉命試之無驗帝憂形于色親從都將王建及進曰臣請効命乃以巨索連舟十艘選効節勇士三百人持斧被鎧鼓柁而進至中流梁樓船三層蒙以牛革懸板爲楯建及率持斧者入艨艟間斬其竹竿破其懸楯又于上流取甕數百用竹竿維之積薪于上灌以脂膏火發瓦空又以巨艦載甲士令乘煙鼓譟梁之樓船斷絕而下沈溺者殆半軍旣得渡梁軍乃退命騎軍追襲至濮陽俘斬千計賀瓌由此飲氣邁疾而卒秋七月帝歸晉陽八月梁將王瓚帥衆數萬自黎陽渡河營于楊村造舟爲梁以通津路冬十月帝自

晉陽至魏州發徒數萬以廣德勝北城自是日與梁軍接戰十二月戊戌帝軍于河南夜伏兵于潘張村梁軍寨下以騎軍掠其餉運擒其斥候梁王瓚結陣以待帝軍以鐵騎突之諸軍繼進梁軍大奔赴水死者甚衆瓚走保北城天祐十七年春幽州民于田中得金印文曰關中龜印李紹宏獻于行臺秋七月梁將劉鄩尹皓寇同州先是河中節度使朱友謙取同州以其子令德主畱務請梁主降節梁主怒不與遂請旄節于帝梁主乃遣劉鄩與華州節度使尹皓帥兵圍同州友謙來告難帝遣蕃漢總管李存審昭義節度使李嗣昭代州刺史



王建及率師赴援九月師至河中朝至夕濟梁人不意王師之至望之大駭明日約戰與朱友謙謀遲明進軍拒梁壘梁人悉衆以出蒲師在南王師在北騎軍旣接蒲人小卻李嗣昭以輕騎抗之梁軍奔潰追斬二千餘級是夜劉鄩收餘衆保營自是閉壁不出數日鄩遂宵遁王師追及于渭河所棄兵仗輜重不可勝計劉鄩尹皓單騎獲免未幾鄩憂恚發病而卒王師略地至奉先嗣昭因謁唐帝諸陵而還天祐十八年春正月魏州開元寺僧傳真獲傳國寶獻于行臺驗其文卽受命于天子孫寶之八字也羣僚稱賀傳真師于廣明中遇京師

喪亂得之祕藏已四十年矣篆文古體人不之識至是獻之時淮南楊溥四川王衍皆遣使致書勸帝嗣唐帝位帝不從二月代州刺史王建及卒是月鎮州大將張文禮殺其帥王鎔時帝方與諸將宴酒酣樂作聞鎔遇弑遽投解而泣曰趙王與吾把臂同盟分如金石何負于人覆宗絕祀冤哉先是溥沱暴漲漂闕城之半溺死者千計是歲天西北有赤祲如血占者言趙分之災至是果驗時張文禮遣使請旄節于帝帝曰文禮之罪期于無赦敢邀予旄節左右曰方今事繁不欲與人生事帝不得已而從之乃承制授文禮鎮州兵馬畱後三月



河中節度使朱友謙昭義節度使李嗣昭滄州節度使  
李存審定州節度使王處直邢州節度使李嗣源成德  
軍兵馬留後張文禮遙領天平軍節度使閻寶大同軍  
節度使李存璋新州節度使王郁振武節度使李存進  
同州節度使朱令德各遣使勸進請帝紹唐帝位帝報  
書不允自是諸鎮凡三上章勸進各獻貨幣數十萬以  
助卽位之費帝左右亦勸帝早副人望帝搗挹久之九  
志趙季良傳季良嘗夢手扶御座自謂輔佐之秋七月  
象由是頗述天時人事以諷莊宗深納其言  
河東節度副使盧汝弼卒八月庚申令天平節度使閻  
寶成德兵馬留後符習率兵討張文禮于鎮州初王鎔

令偏將符習以本部兵從帝屯于德勝文禮旣行弑逆  
忌鎔故將多被誅戮因遣使聞于帝欲以他兵代習歸  
鎮習等懼請留帝令傳旨于習及別將趙仁貞烏震等  
明正文禮弑逆之罪且言爾等荷戟從征蓋君父之故  
銜冤報恩誰人無心吾當給爾資糧助爾兵甲爾試思  
之于是習等率諸將三十餘人慟哭于牙門請討文禮  
帝因授習成德軍兵馬留後以部下鎮冀兵致討于文  
禮又遣閻寶以助之以史建瑋爲前鋒甲子攻趙州刺  
史王鋌送符印以迎閻寶遂引軍至鎮州城下營于西  
北隅是月張文禮病疽而卒其子處理代掌軍事九月



前鋒將史建瑋與鎮人戰于城下為流矢所中而卒冬十月己未梁將戴思遠攻德勝北城帝命李嗣源設伏于戚城令騎軍挑戰梁軍大至帝御中軍以禦之時李從珂偽為梁幟奔入梁壘斧其眺樓持級而還梁軍愈恐步兵漸至李嗣源以鐵騎三千乘之梁軍大敗俘斬二萬計辛酉閻寶上言定州節度使王處直為其子都幽于別室都自稱留後歐陽史王處直叛附于契丹其子都幽處直以來附十一月帝至鎮州城下張處瑾遣弟處琪幕客齊儉等候帝乞降言猶不遜帝命囚之時王師築土山以攻其壘城中亦起土山以拒之旬日之間機巧百變張處瑾令韓

正時以千騎夜突圍將入定州與王處直議事為我游

軍追擊破之餘眾保衡唐賊將彭贇斬正時以降十二

月辛未王郁誘契丹安巴堅寇幽州契丹國志王處直在定州以鎮定為

唇齒恐鎮亡而定孤乃潛使人語其子王郁使賂契丹令犯塞以救鎮州之圍王郁說太祖曰鎮州美女如雲金帛似山天皇速往則皆為已物也不然遂引軍涿州

則為晉王所有矣太祖以為然率眾而南

陷之又寇定州王都遣使告急帝自鎮州率五千騎赴

之天祐十九年春正月甲午帝至新城契丹前鋒三千

騎至新樂是時梁將戴思遠乘虛以寇魏州軍至魏店

李嗣源自領兵馳入魏州梁人知其有備乃西渡洹水

陷成安而去時契丹渡沙河而諸將相顧失色又聞梁



人內侵鄴城危急皆請旋師唯帝謂不可乃率親騎至  
新城契丹萬餘騎遽見帝軍惶駭而退帝分軍爲二廣  
追躡數十里獲安巴堅之子時沙河水薄橋梁隘狹敵  
爭踐而過陷溺者甚衆安巴堅方在定州聞前軍敗退  
保望都帝至定州王都迎謁是夜宿于開元寺翼日引  
軍至望都契丹逆戰帝身先士伍馳擊數四敵退而結  
陣帝之徒兵亦陣于水次李嗣昭躍馬奮擊敵衆大潰  
俘斬數千追擊至易州獲氍毹裘毳幕羊馬不可勝紀時  
歲且北至大雪平地五尺敵乏芻糧人馬斃踏道路纍  
纍不絕帝乘勝追襲至幽州契丹國志晉王趨望都爲契丹所圍力戰出入數四

不解李嗣昭引三百騎橫擊之晉王始得出因縱兵奮擊太祖兵敗遂北至易州會大雪彌旬平地數尺人馬死者相屬是月梁將戴思遠寇德勝北城築壘穿塹地

太祖乃歸道雲梯晝夜攻擊李存審極力拒守城中危急帝自幽州聞之倍道兼行以赴梁人聞帝至燒營而遁三月丙午王師敗于鎮州城下閻寶退保趙州時鎮州累月受圍城中艱食王師築壘環之又決滹沱水以絕城中出路是日城中軍出攻其長圍皆奮力死戰王師不能拒引師而退鎮人壞其營壘取其芻糧者累日帝聞失律卽以昭義節度使李嗣昭爲北面招討使進攻鎮州夏四月嗣昭爲流矢所中卒于師已卯天平節度使閻寶



卒以振武節度使李存進爲北面招討使是月大同軍節度使李存璋卒五月乙酉李存進圍鎮州營于東渡八月梁將段凝陷衛州刺史李存儒被擒存儒本俳優也帝以其有膂力故用爲衛州刺史旣而誅斂無度人皆怨之故爲梁人所襲

九國志趙季良傳莊宗入鄴時兵革屢興屬邑租賦逋久一日

莊宗召季良切責之季良對曰殿下何時平河南莊宗正色曰爾掌輿賦而稽緩安問我勝負乎季良曰殿下謀攻守復務急徵一旦衆心有變恐河南非殿下所有莊宗斂容前席曰微君之言幾失吾大計

梁將戴思遠又陷其城新鄉等邑自是澶淵之西相州之南皆爲梁人所據九月戊寅朔張處球悉城中兵奄至東垣渡急攻我之壘門時騎軍已臨賊城不覺其出李存

進惶駭引十餘人鬪于橋上賊退我之騎軍前後夾擊之賊衆大敗步卒數千殆無還者是役也李存進戰歿于師以蕃漢馬步總管李存審爲北面招討使以攻鎮州丙午夜趙將李再豐之子冲投縋以接王師諸軍登城遲明畢入鎮州平獲處球處瑾處琪并其母及同惡高濛李翥齊儉等皆折足送行臺鎮人請醢而食之發張文禮尸磔于市帝以符習爲鎮州節度使烏震爲趙州刺史趙仁貞爲深州刺史李再豐爲冀州刺史鎮人請帝兼領本鎮從之乃以符習遙領天平軍節度使十一月河東監軍張承業卒十二月以魏州觀察判官張



憲權知鎮州軍州事

同光元年春正月丙子五臺山僧獻銅鼎三言于山中石崖間得之二月新州團練使李嗣肱卒是時以諸藩鎮相繼上牋勸進乃命有司制置百官省寺仗衛法物期以四月行卽位之禮以河東節度判官盧質爲大禮使三月己卯以橫海軍節度使內外蕃漢馬步總管李存審爲幽州節度使潞州留後李繼韜叛送款于梁是月築卽位壇于魏州牙城之南夏四月己巳帝昇壇祭告昊天上帝遂卽皇帝位文武臣寮稱賀禮畢御應天門宣制改天祐二十年爲同光元年大赦天下自四月

二十五日昧爽以前除十惡五逆放火行劫持杖殺人官典犯賊屠牛鑄錢合造毒藥外罪無輕重咸赦除之應蕃漢馬步將校竝賜功臣名號超授檢校官已高者與一子六品正員官兵士竝賜等第優給其戰歿功臣各加追贈仍賜諡號民年八十已上與免一子役內外文武職官竝可直言極諫無有隱諱貢選二司宜令有司速商量施行雲應蔚朔易定幽燕及山後八軍秋夏稅率量與蠲減民有三世已上不分居者與免雜徭諸道應有祥瑞不用聞奏赦書有所未該委所司條奏以聞云是歲自正月不雨人心憂恐宣赦之日澍雨溥降



初唐咸通中金水土火四星聚于畢昴太史奏畢昴趙魏之分其下將有王者懿宗乃詔令鎮州王景崇被袞冕攝朝三日遣臣下備儀注軍府稱臣以厭之其後四十九年帝破梁軍于柏鄉平定趙魏至是卽位于鄴宮是月以行臺左丞相豆盧革爲門下侍郎同中書門下平章事太清宮使以行臺右丞相盧澄爲中書侍郎平章事監修國史以前定州掌書記李德休爲御史中丞以河東節度判官盧質爲兵部尚書充翰林學士承旨以河東掌書記馮道爲戶部侍郎充翰林學士以魏博鎮冀觀察判官張憲爲工部侍郎充租庸使以中門使

郭崇韜昭義監軍使張居翰竝爲樞密使以權知幽州軍府事李紹宏爲宣徽使以魏博節度判官王正言爲禮部尚書行興唐尹以河東軍城都虞候孟知祥爲太原尹充西京副畱守以澤潞節度判官任圜爲工部尚書兼真定尹充北京副畱守詔升魏州爲東京興唐府改元城縣爲興唐縣貴鄉縣爲廣晉縣以太原爲西京以鎮州爲北都是時所管節度一十三州五十閏月丁丑以李嗣源爲檢校侍中依前橫海軍節度使內外蕃漢副總管以幽州節度使李存審爲檢校太師兼中書令依前蕃漢馬步總管以河東節度使朱友謙爲檢校



太師兼尚書令安國軍節度使符習加同平章事定州節度使王都加檢校侍中是月追尊曾祖蔚州太保爲昭烈皇帝廟號懿祖夫人崔氏曰昭烈皇后追尊皇祖代州太保爲文景皇帝廟號獻祖夫人秦氏曰文景皇后追尊皇考河東節度使太師中書令晉王爲武皇帝廟號太祖詔于晉陽立宗廟以高祖神堯皇帝太宗文皇帝懿宗昭聖皇帝昭宗聖穆皇帝及懿祖以下爲七廟甲午契丹寇幽州至易定而還時有自鄆來者言節度使戴思遠領兵在河上州城無守兵可襲而取之帝召李嗣源謀曰昭義阻命梁將董璋攻迫澤州梁志在

澤潞不虞別有事生汶陽無備不可失也嗣源以爲然壬寅命嗣源率步騎五千箝枚自河趨鄆是夜陰雨我師至城下鄆人不覺遂乘城而入鄆州平制以李嗣源爲天平軍節度使梁主聞鄆州陷大恐乃遣王彥章代戴思遠總兵以來拒時朱守殷守德勝南城帝懼彥章奔衝遂幸澶州五月辛酉彥章夜率舟師自楊村浮河而下斷德勝之浮橋攻南城陷之帝命中書焦彥賓馳至楊劉固守其城命朱守殷撤德勝北城屋木攻具浮河而下以助楊劉是時德勝軍食芻茭薪炭數十萬計至是令人輦負入澶州事旣倉猝耗失殆半朱守殷以



所毀屋木編椳置步軍于其上王彥章以舟師沿流而下各行一岸每遇轉灘水滙卽中流交鬪流矢雨集或全舟覆沒一彼一此終日百戰比及楊劉殆亡其半已巳王彥章投疑率大軍攻楊劉南城焦彥賓與城守將李周極力固守梁軍晝夜攻擊百道齊進竟不能下遂結營于楊劉之南東西延袤數十柵六月己亥帝親御軍至楊劉登城望見梁軍重壕複壘以絕其路帝乃選勇士持短兵出戰梁軍于城門外連延屈曲穿掘小壕伏甲兵于中候帝軍至則弓弩齊發師人多傷兵不得進帝患之問計于郭崇韜崇韜請于下流據河築壘以

救鄆州又請帝日令勇士挑戰旬日之內寇若不至營壘必成帝善之卽令崇韜與毛璋率數千人中夜往博州濟河東晝夜督役居六日營壘將成戊子梁將王彥章杜晏球領徒數萬晨壓帝之新壘時板築雖畢牆仞低庳戰具未備沙城散惡王彥章列騎環城虐用其人使步軍堙壕登堞又于上流下巨艦十餘艘扼斷濟路自旦至午攻擊百端城中危急帝自楊劉引軍陣于西岸城中望之大呼帝艤舟將渡梁軍遂解圍退保鄒家口秋七月丁未帝御軍沿河而南梁軍棄鄒家口夜遁委棄鍋甲芻糧千計戊午遣騎將李紹貽直抵梁軍壘



梁益恐又聞李嗣源自鄆州引大軍將至己未夜梁軍拔營而遁復保于楊村帝軍屯于德勝甲子帝幸楊劉城巡視梁軍故壘八月壬申朔帝遣李紹斌以甲士五千援澤州初李繼韜之叛也潞之舊將裴約以兵戍澤州不徇繼韜之逆既而梁遣董璋率衆攻其城約拒守久之告急于帝故遣紹斌救之未至而城已陷裴約被害帝聞之嗟痛不已甲戌帝自楊劉歸鄴梁以段凝代王彥章爲帥戊子凝帥衆五萬結營于王村自高陵渡河帝軍遇之生擒梁前鋒軍士二百人戮于都市庚寅帝御軍至朝城戊戌梁左右先鋒指揮使康延孝領百

騎來奔帝虛懷引見賜御衣玉帶屏人問之對曰臣竊觀汴人兵衆不少論其君臣將校則終見敗亡趙慶趙鵠張漢傑居中專政締結宮掖賄賂公行段凝素無武略一朝便見大用霍彥威王彥章皆宿將有名翻出其下自彥章獲德勝南城梁主亦稍獎使彥章立性剛暴不耐凌制梁主每一發軍卽令近臣監護進止可否悉取監軍處分彥章悒悒移于顏色自河津失利投凝彥章又獻謀欲數道舉軍令董璋以陝鏡澤潞之衆趨石會關以寇太原霍彥威統關西汝洛之衆自相衛以寇鎮定段凝杜晏球領大軍以當陛下令王彥章張漢傑



統禁軍以攻鄆州決取十月內大舉又自滑州南決破河堤使水東注曹濮之間至于汶陽瀰漫不絕以陷北軍臣在軍側聞此議臣惟汴人兵力聚則不少分則無餘陛下但待分兵領鐵騎五千自鄆州兼程直抵于汴不旬日天下事定矣帝懌然壯之九月壬寅朔帝在朝城凝兵至臨河南與帝之騎軍接戰是時澤潞叛衛州黎陽爲梁人所據州以西相以南寇鈔日至編戶流亡計其軍賦不支半年又王郁盧文進召契丹南侵瀛涿及聞梁人將圖大舉帝深憂之名將吏謀其大計或曰自我得汶陽以來須大將固守城門之外元是賊疆細

而料之得不如失今若馳檄告諭梁人却衛州黎陽以爲鄆州指河爲界約且休兵我國力稍集則議改圖帝曰嘻行此謀則無葬地矣時郭崇韜勸帝親御六軍直趨汴州半月之間天下可定帝曰正合朕意大丈夫得則爲王失則爲寇予行計決矣又問司天監對曰今歲時不利深入必無成功帝弗聽戊辰梁將王彥章率衆至汶河李嗣源遣騎軍偵視至遞公鎮梁軍來挑戰嗣源以精騎擊而敗之生擒梁將任釗田章等三百人俘斬二百級彥章引衆保于中都嗣源飛騎告捷帝置酒大悅曰是當決行渡河之策已已下令軍中將士家屬



竝令歸鄴

舊五代史卷二十九

舊五代史卷二十九攷證

唐莊宗紀三未幾鄆憂恚發病卒

案梁書劉鄆傳作

遇醜而卒

鎮州大將張文禮殺其帥王鎔

案歐陽史作正月趙

將張文禮弒其君鎔五代春秋作三月趙人張文禮

殺其君鎔與是書繫二月前後互異

遂引軍涿州陷之

案契丹陷涿州在天祐十八年李

嗣弼傳作天祐十九年紀傳互異

行臺右丞相盧澄

盧澄歐陽史作盧程攷北夢瑣言

亦作澄今仍其舊

乾隆四十九年校刊

舊五代史卷二十九

文澄

二



帝令中書焦彥賓馳至楊劉固守其城 案通鑑作帝  
令宦者焦延賓急趨楊劉與鎮使李周固守其城  
六月己亥帝親御軍至楊劉 案己亥通鑑作乙亥  
帝艤舟將渡梁軍遂解圍 案歐陽史作六月及王彥  
章戰于新壘敗之據是書則王彥章因救至而解圍  
未嘗敗績也

遣騎將李紹貽

李紹貽通鑑作李紹榮

至遞公鎮 遞公鎮通鑑從莊宗實錄作遞坊鎮攷是  
書明宗紀亦作遞坊惟通鑑攷異所引薛史作遞公  
今姑仍其舊

安巴堅舊作阿保機今改



舊五代史卷二十九政證

舊五代史卷三十

宋門下侍郎參知政事監修國史薛居正等撰

唐書第六

莊宗紀四

同光元年冬十月辛未朔日有食之是日皇后劉氏皇子繼岌歸鄴宮帝送于離亭獻欵而別詔宣徽使李紹宏宰相豆盧革租庸使張憲與唐尹王正言同守鄴城壬申帝御大軍自楊劉濟河癸酉至鄆州是夜三鼓渡汶時王彥章守中都甲戌帝攻之中都素無城守師旣雲合梁衆自潰是日擒梁將王彥章及都監張漢傑趙



舊唐書卷三十一 本紀  
一  
廷隱劉嗣彬李知節康文通王山興等將吏二百餘人  
斬馘二萬奪馬千匹時旣獲中都之捷帝召諸將謀其  
所向或言且徇兗州徐圖進取唯李嗣源曰宜急趨汴  
州段凝方領大軍駐于河上假如便來赴援直路又阻  
決河須自滑州濟渡十萬之衆舟楫焉能卒辦此去汴  
城咫尺若晝夜兼程信宿卽至段凝未起河壩夷門已  
爲我有矣臣請以千騎前驅陛下御軍徐進鮮不克矣  
帝嘉之是夜嗣源率前軍先進翼日車駕卽路丁丑次  
曹州郡將出降己卯遲明前軍至汴城嗣源令左右捉  
生攻封邱門梁開封尹王瓚請以城降俄而帝與大軍

繼至王瓚迎帝自大梁門入梁朝文武官屬于馬前謁  
見陳叙世代唐臣陷在僞廷今日再覩中興雖死無恨  
帝諭之曰朕二十年血戰蓋爲卿等家門無足憂矣各  
復乃位時梁末帝朱鋹已爲其將皇甫麟所殺獲其首  
函之以獻是日賜樂工周匝幣帛周匝者帝之寵伶也  
胡柳之役陷于梁帝每思之至是謁見欣然慰接周匝  
因言梁教坊使陳俊保庇之恩垂泣推薦請除郡守帝  
亦許之庚辰帝御元德殿梁百官于朝堂待罪詔釋之  
壬午段凝所部馬步軍五萬解甲于封邱凝等率大將  
先至請死詔各賜錦袍御馬金幣帝幸北郊撫勞降軍



各令還本營丙戌詔曰懲惡勸善務振紀綱激濁揚清  
須明真僞蓋前王之令典爲歷代之通規必按舊章以  
令多士而有志萌僭竊位忝崇高累世官而皆受唐恩  
貪爵祿而但從僞命或居台鉉或處權衡或列近職而  
預機謀或當峻秩而掌刑憲事分逆順理合去畱僞宰  
相鄭珏等一十一人皆本朝簪組儒苑品流雖博識多  
聞備明今古而修身慎行頗負祖先昧忠貞而不度安  
危專利祿而全虧名節合當大辟無恕近親朕以纘嗣  
丕基初平巨憝方務好生之道在行舍垢之恩湯網垂  
仁旣務全族舜刑投裔兼貸一身爾宜自新我全大體

其爲顯列不竝庶寮餘外應在周行悉仍舊貫凡居中  
外咸體朕懷乃貶梁宰相鄭珏爲萊州司戶蕭頃爲登  
州司戶翰林學士劉岳爲均州司馬任贊房州司馬姚  
顛復州司馬封翹唐州司馬李懌懷州司馬竇夢徵沂  
州司馬崇政院學士劉光素密州司戶陸崇安州司戶  
御史中丞王權隨州司戶竝員外置同正員是日以梁  
將段凝上疏奏梁朝權臣趙巖等竝助成虐政結怨于  
人聖政惟新宜誅首惡乃下詔曰朕旣殄僞庭顯平國  
患好生之令含宏雖切于予懷懲惡之規決斷難違于  
衆請況趙巖趙鵠等自朕收城數日布惠四方尚匿迹



以潛形罔悛心而革面須行赤族以謝衆心其張漢傑  
昨于中都與王彥章同時俘獲此際未詳行止偶示哀  
矜今既上將陳詞羣情激怒往日既彰于僭濫此時難  
漏于網羅宜寘國刑以塞羣論除妻兒骨肉外其他疏  
屬僕使竝從釋放敬翔李振首佐朱溫共傾唐祚屠害  
宗屬殺戮朝臣既寰宇以皆知在人神而共怒敬翔雖  
聞自盡未豁幽冤宜與李振竝族于市疎屬僕使竝從  
原宥朱珪素聞狡蠹唯務讒邪鬪惑人情枉害良善將  
清內外須切去除況衆狀指陳亦宜誅戮契丹實喇鄂  
博既棄其母又背其兄朕比重懷來厚加恩渥看同骨

肉錫以姓名兼分符竹之榮疊被頒宣之渥而乃輒辜  
重惠復背明廷罔顧欺違竄歸僞室既同梟獍難貸刑  
章可并妻子同戮于市其朱氏近親趙鵠正身趙巖家  
屬仰嚴加擒捕其餘文武職員將校一切不問是日趙  
巖張希逸張漢傑張漢倫張漢融朱珪敬翔李振及契  
丹實喇鄂博等并其妻孥皆斬于汴橋下又詔除毀朱  
氏宗廟神主僞梁二主并降爲庶人天下官名府號及  
寺觀門額曾經改易者竝復舊名時帝欲發梁祖之墓  
斲棺燔柩河南尹張全義上章申理乞存聖恩通鑑張全義上  
言朱溫雖國之深讐然其人已死刑無可加屠滅其家足以爲報乞免焚斲以存聖恩帝乃止令



剗去闕室而已丁亥梁百官以誅凶族于崇元殿立班

待罪詔各復其位洛陽縉紳舊聞記載張全義表云伏

未蒙昭雪因以樞密使檢校太保守兵部尚書郭崇韜

權行中書事已丑御崇元殿制曰仗順討逆少康所以

誅有窮續業承基光武所以滅新莽咸以中興景命再

造王猷經綸于草昧之中式遏于亂畧之際朕以欽承

大寶顯荷鴻休雖繼前修固慙涼德誓平元惡期復本

朝屬四海之阡危允萬邦之推戴近者親提組練徑掃

氛祇振已墮之皇綱殄偷安之寇孽國讐方雪帝道爰

開拯編氓覆溺之艱救率土倒懸之苦粵自朱溫搆逆

友貞嗣凶篡殺二君殘九廟虺毒久傷于宇宙狼貪

肆噬于華夷剝喪元良凌辱神主帝里動黍離之嘆朝

廷多棟橈之危棄德崇奸窮兵黷武戰士疲勞于力役

烝民耗竭其膏腴言念于斯軫傷彌切今則已梟逆豎

大豁羣情覩歷數之有歸實神靈之匪昧得不臨深表

誠馭朽為懷將宏濟于艱難宜特行于赦宥應偽命流

貶責授官等已經量移者並可復資徒流人放歸鄉里

京畿及諸道見禁囚徒大辟罪降從流流已下咸赦除

之其鄭珏等一十一人未及移復之限應扈從征討將

校及諸官員職掌節級馬步兵士及河北諸處屯駐守



戊兵士等皆情堅破敵業茂平淮副予戡定之謀顯爾忠勤之節竝據等第續議獎勵其有歿于王事未經追贈者各與贈官如有子孫堪任使者竝量材錄任應僞庭節度觀察防禦團練等使及刺史監押行營將校等竝願恩詔不議改更仍許且稱舊銜當俟別加新命理國之道莫若安民勸課之規宜從薄賦庶遂息肩之望冀諧鼓腹之謠應諸道戶口竝宜罷其差役各務營農所係殘欠賦稅及諸務懸欠積年課利及公私債負等其汴州城內自收復日已前竝不在徵理之限其諸道自壬午年十二月已前竝放北京及河北先以祆祿未

平配買征馬如有未請却官本錢及買馬不迨者可放免應有本朝宗屬及內外文武臣寮被朱氏無辜屠害者竝可追贈如有子孫及本身逃難于諸處漂寓者竝令所在尋訪津置赴闕義夫節婦孝子順孫旌表門閭量加賑給或鰥寡惇獨無所告者仰所在各議拯救民年過八十者免一子從征其有先投過僞庭將校官吏等一切不問云甲午以樞密使檢校太保守兵部尚書太原縣男郭崇韜爲開府儀同三司守侍中監修國史兼真定尹成德軍節度使依前樞密使太原郡侯仍賜鐵券乙未詔宰相豆盧革權判吏部上銓御史中丞李



德休權判東西銓事丙申滑州畱後檢校太保段凝可  
依前滑州畱後仍賜姓名紹欽以金紫光祿大夫檢校  
司空守輝州刺史杜晏球爲檢校司徒依前輝州刺史  
仍賜姓名紹虔詔處斬隨駕兵馬都監夏彥朗于和景  
門外時宦官怙寵廣侵占居人第舍郭崇韜奏其事乃  
斬彥朗以徇丁酉賜百官絹二千匹錢二百萬職事絹  
一千匹錢百萬戊戌以竭忠啟運匡國功臣天平軍節  
度使開府儀同三司檢校太傅兼侍中蕃漢馬步總管  
副使隴西郡侯李嗣源爲依前檢校太傅兼中書令天  
平軍節度使特進封開國公加食邑實封餘如故以開

府儀同三司檢校太傅北都畱守興聖宮使判六軍諸  
衛事李繼岌爲檢校太尉同平章事充東京畱守詔御  
史臺班行內有欲求外職或要分司各許于中書投狀  
奏聞己亥宴勲臣于崇元殿梁室故將咸預焉帝酒酣  
謂李嗣源曰今日宴客皆吾前日之勅敵一旦同會皆  
卿前鋒之力也梁將霍彥威戴思遠等皆伏陛叩頭帝  
因賜御衣酒器盡歡而罷齊州刺史孟璆上章請死詔  
原之璆初事帝爲騎將天祐十三年帝與劉鄩莘縣對  
壘璆領七百騎奔梁至是來請罪帝報之曰爾當吾急  
引七百騎投賊何面目相見璆惶恐請死帝恕之未幾



移貝州刺史庚子帝畋于汴水之陽十一月辛丑朔有  
司奏河南州縣見使僞印望追毀改鑄從之以光祿大  
夫檢校太傅左金吾上將軍兼領左龍武軍事汾州刺  
史李存渥爲滑州節度使加特進同平章事以雜指揮  
散員都部署特進檢校太傅忻州刺史李紹榮爲徐州  
節度使以滑州兵馬畱後檢校太保李紹欽爲兗州節  
度使壬寅鳳翔節度使秦王李茂貞遣使賀收復天下  
癸卯河中節度使西平王朱友謙來朝乙巳賜友謙姓  
改名繼麟帝令皇子繼岌兄事之以捧日都指揮使博  
州刺史康延孝爲鄭州防禦使檢校太保賜姓名繼琛

以宋州節度使檢校太尉平章事袁象先依前爲宋州  
節度使仍賜姓名紹安以許州匡國軍節度使檢校太  
尉同平章事溫韜依前許州節度使仍賜姓名紹冲丁  
未日南至帝不受朝賀戊申中書門下上言以朝廷兵  
革雖寧支費猶闕應諸寺監各請置卿少卿監祭酒司  
業各一員博士二員餘官竝停唯太常寺事關大禮大  
理寺事關刑法除太常博士外許更置丞一員其王府  
及東宮官司天五官正奉御之屬凡關不急司存並請  
未議除授其諸司郎中員外應有雙曹者且置一員左  
右常侍諫議大夫給事中起居郎起居舍人補闕拾遺



各置一半三院御史仍委御史中丞條理申奏其停罷朝官仍各錄名銜具罷任時日畱在中書候見任官滿二十五箇月並據資品却與除官其西班牙上將軍已下仍望宣示樞密院斟酌施行從之時議者以中興之朝事宜恢廓驟茲自弱頓失物情已酉詔應隨處官吏務局員寮諸軍將校等如聞前例各有進獻直貢章奏不唯褻黷于朝廷實且傍滋于誅斂並宜止絕以肅化風又詔左降均州司馬劉岳有母年踰八十近聞身故準故事許歸候三年喪服闋如未量移卽却赴貶州壬子詔取今月二十四日幸洛京以十二月二十三日朝獻

太微宮二十四日朝獻太廟二十五日有事于南郊癸未中書門下奏應隨駕及在京有帶兼官者並望落下只守本官從之乙卯以特進檢校太傅開封尹判六軍諸衛事充功德使王瓚爲宣武軍節度副使權知軍州事丁巳以銀青光祿大夫尚書左丞趙光允爲中書侍郎平章事集賢殿大學士以朝散大夫禮部侍郎韋說守本官同平章事以吏部侍郎史館修撰判館事盧文度爲兵部侍郎充翰林學士以右散騎常侍充宏文館學士判館事馮錫嘉爲戶部侍郎知制誥充翰林學士以翰林學士守尚書膳部員外郎劉昫爲比部郎中知



制誥依前充職以扈鑾書制學士行尚書倉部員外郎  
趙鳳爲倉部郎中知制誥充翰林學士以左拾遺于嶠  
守本官充翰林學士戊午以中書侍郎平章事豆盧革  
判租庸使兼諸道鹽鐵轉運等使新羅王金朴英遣使  
貢方物己未以洛京留守判六軍諸衛事守太尉兼中  
書令河南尹魏王張全義爲檢校太師守中書令餘如  
故以荆南節度使檢校太師守中書令渤海王高季興  
依前檢校太師守中書令餘如故庚申以工部尚書眞  
定尹北都副留守知留守事任圜爲檢校吏部尚書兼  
御史大夫充成德軍節度使行軍司馬知軍府事安義

軍節度使李繼韜入見待罪詔釋之辛酉以宣化軍留  
後檢校太傅戴思遠權知青州軍州事檢校司空左監  
門上將軍安崇阮並檢校舊官却復本任以鎮國軍留  
後檢校太傅霍彥威爲保義軍節度留後以權知威化  
軍留後檢校司徒高允貞權知鎮國軍留後以權知河  
陽留後檢校太保張繼業依前權知河陽留後以鄜延  
兩鎮節度使檢校太師兼中書令西平王高萬興依前  
鄜延節度使仍封北平王襄州節度使檢校太傅平章  
事孔勅依前襄州節度使餘如故以永平軍節度使行  
大安尹檢校太保張筠爲西都留守行京兆尹以晉州



節度使檢校太保劉玘邠州節度使檢校太保韓恭安  
州節度使檢校太保朱漢賓並檢校舊官却復本任壬  
戌以左金吾衛大將軍史敬鎔爲左街使右金吾衛大  
將軍李存確爲右街使甲子車駕發汴州十二月庚午  
朔車駕至西京是日有司自石橋具儀仗法物迎引入  
于大內辛未以百官初到放三日朝參壬申以租庸使  
刑部侍郎太清宮副使張憲爲檢校吏部尚書充北京  
副畱守知畱守事太原尹詔改取來年二月一日行郊  
禮戊寅詔德勝寨莘縣楊劉口通津鎮胡柳陂皆戰陣  
之所宜令逐處差人收掩戰士骸骨量備祭奠以慰勞

魂詔改僞梁永平軍大安府復爲西京京兆府改宋州  
宣武軍爲歸德軍汴州開封府復爲宣武軍華州感化  
軍爲鎮國軍許州匡國軍復爲忠武軍華州宣義軍復  
爲義成軍陝府鎮國軍復爲保義軍耀州靜勝軍復爲  
順義軍潞州匡義軍復爲安義軍朗州武順軍復爲武  
貞軍延州爲彰武軍鄧州爲威勝軍晉州爲建雄軍安  
州爲安遠軍淮南楊溥遣使賀登極稱大吳國主書上  
大唐皇帝十國春秋吳世家云唐以滅梁來告始稱詔  
我國不受唐主隨易書用敵國禮曰大唐皇帝  
帝致書于吳國主王遣司農卿盧蘋獻金器二百兩銀  
器三千兩羅錦一千二百疋龍腦香五斤龍鳳絲鞵一  
百事于唐又遣使張景報聘稱大吳  
國主上書大唐皇帝辭禮如牋表



辰御史臺上言請行用本朝律令格式今訪聞唯定州有本朝法書望下本州寫副本進納從之辛巳詔貶安義軍節度使李繼韜爲登州長史尋斬于天津橋下再謀叛故也甲申淮南楊溥奚首領李紹威並遣使朝貢乙酉以翰林學士承旨盧質權知汴州軍府事以禮部尚書崔沂爲尚書左丞判吏部尚書銓事以兵部侍郎崔協爲吏部侍郎以刑部侍郎充集賢殿學士判院事盧文紀爲尚書兵部侍郎依前充集賢殿學士判院事丁亥澤州刺史董璋上言潞州軍變李繼達領兵出城自刎而死節度副使李繼珂已安撫軍城已丑有司上

言上辛祈穀于上帝請奉高祖神堯皇帝配孟夏雩祀請奉太宗文皇帝配季秋大享于明堂請奉太祖武皇帝配冬至日祀圜丘請奉獻祖文皇帝配孟冬祭神州地祇請奉懿祖昭聖皇帝配從之辛卯亳州太清宫道士上言聖祖殿前古檜萎瘁已久再生一枝畫圖以進詔曰當聖祖舊殿生枯檜新枝應皇家再造之期顯大國中興之運同上林仆柳祥旣叶于漢宣比南頓嘉禾瑞更超于光武宜標史冊以示寰瀛云

五代會要唐高祖神堯皇帝武

德二年枯檜重華至安祿山僭號萎瘁明皇自蜀歸京枝葉復盛至是再生一枝長二尺餘

壬辰幸伊闕已巳以中書舍人崔居儉爲刑部侍郎充史館修



撰判館事甲午以租庸副使光祿大夫檢校司徒守衛尉卿孔謙爲鹽鐵轉運副使

舊五代史卷三十

舊五代史卷三十攷證

唐莊宗紀四以趙光允爲中書侍郎平章事集賢殿大學士  
案歐陽史作趙光允爲中書侍郎不載大學士銜與是書詳畧異

甲子車駕發汴州十二月庚午朔車駕至西京 案歐陽史作甲子如洛京庚午至自汴州是書作西京蓋其時未改永平軍爲西京故尚仍梁制稱洛陽爲西京也又通鑑攷異云諸書但謂之洛京未嘗詔改西京爲洛京至同光三年始詔依舊以洛京爲東都或者以永平爲西京時卽改梁西京爲洛京而史脫其



文也歐陽史於元年冬即書洛京未審所據

詔改偽梁永平軍大安府復為西京京兆府 案歐陽

史作十一月辛酉復永平軍為西都與是書日月互

異

實喇鄂博舊作撒刺阿撥今改

舊五代史卷三十攷證



